


MAPÀ À NZAMBI ÀTU MISANGU YÔNSÒ ÀNU ÀPETA MYABA YÀWÙ

 Twasàkidila, Mwanèètù Neville. [Mwanèètù Neville ùdi wamba ne: “Nzambi àkubènèshè, mwanèètù wa balùme.”—Muf.] Mukalenge àkubènèshè, mwanèètù wa balùme.

Dilòlò dilenga, balunda bàànyì. Ndi mfuma ku dibwela, kukaadi katanci, nènku mvwa ndyambidila ne mvwa mwà kupweka ne kunùjngila nwênù bônso “Noël wa Disànka.”

² Ne pa nàнку ncívwa mumanye ne mvwakù mufwànyìne kwikala ne dyèsè edi dinène dyà kuyiikilanganakù neenù pa Dìyì dyà Mukalenge to. Ki Mwanèètù Neville kundombaye, nènku mvwa ne tuntu twàbúngì twà Noël tufùnda tùmva nkwàta naatu mudimu, kàmwè kàà ku twòtò ku—ku Phoenix ne mu Tucson mwàmwa, mu myaba mishìlèshìlàngàne kuntwaku, diyìsha dyà Noël dyà ciibidilu. Ki mèmè kudyàmbidila, dilòlò edi ne, ndi mufwànyìne kwakula ànu pa kaacintu kampànda kakesè mwab’ewu kàvwà Mukalenge muntèèke mu meeji matùkù mashààle aa, pàmvwà mu Colorado mwàmwa.

³ Nènku mvwa ngeela meeji ku cintu kampànda mu cikondo cyà Noël, ne ndi ne tubeji tutwè ku tutaanu anyi tusambòmbò twà tuntu tukesè tufùnda kaaba aka, Mifùndu ne bikwàbò. Kùdì . . . Ncyèna . . . Ngeela meeji ne Mwanèètù Neville ne bambi bônso bàtu benza nàнку. Wèwè . . . bidi bimweka bu ne cintu kampànda cìdi cìlwa kùdì, pèbè ucifùnda. Windila katanci, ne pashìshe ucifùnda. Ndi ncifùnda ànu pa kàlùpè, ànu pa kàlùpè. Pashìshe pàndi mbikidiibwa musangu kampànda, néntàpe dísù paanyimà ngàmba ne: “Mpindyewu ncinyì cìmvwa mupète eci?” Ki mùshindù ngwòwò awu, patùdi tubiikidiibwa byà cìmpìcìmpìne, nudi bamanyè’s.

⁴ Kale, mvwa . . . pàncívwa citende, mvwa ànu mwà . . . lubàci lwànyì lùvwà lutàmbe kwikala, mvwa mwà kuvùluka cyòci eci ànu dìbà adi, nènku kabívwa bikèngela bwà mèmè kwindila to, mvwa ngeela ànu meeji ne “Kukaadi matùkù dikumi mvwa nsanganyibwa mwaba kampànda, anyi kansanga. Ki cyena-bwalu ncyòci aci. Ki cyòci eci, nènku ki cyòci ciyaayà cyàcyà.”

⁵ Nudi bamanyè’s, kacya ànu ngàpita ndambu wa mikalu, Mwanèètù Higginbotham, ne musabuke ndambù wà misùlu, ne kabìcitu bilwa kàbìdì mùshindù awu to, nkaadi ngenda nyà kule mu njila. Kàdi cìdi . . . bu mwàmbi Mwanèètù Neville, katanci aka ne: “Tukaadi twenda tuseemena pabwìpì, pabwìpì menemene ne Kwètù.”

⁶ Mbîmpè be bwà kwalukila kumbelu. Mémè, mu dyalukila, mòna's, kùvwa nêjè wa dikema. Nènku kùdi . . . nènku mvwa mûmvwè byà njiwu ne bikwàbò, yàbûngì be mu njila, ne bantu bashipiibwa. Nènku anji elaa'yibi meeji à bûngì bwà nkama yà bantu bààjimija mwoyi wàbò mpindyewu, pankaci pà dilòdòlò edi ne paanyimà pà Cidimu Cipyacipyà, mbeena Àmèrikè bûngì kaayi bààfwà! Nènku nudi bamanye's, bàmwè bàà kutùdi mbafwànyine kwikala mwab'ewu mene, dilòdòlò edi. Nènku mbilondeshile mpindyewu, ànu ku . . . ngiikadilu wetù kumpalà kwà Nzambì. Nditùngà dyà dibungama, mwàmbì mwanèètù wa balùme ewu, dibungama myaba yònsò. Ne dibendela dyètù ndibàndisha, dishiila mu njila, munda mwà matùkù makumi asatu, byònsò abi ànu bwà mpèkaatù ne bantu bàdi kabàyi baswè kwitaba njila wa Nzambì wa—wa—wa bintu.

⁷ Nànsha twètù mwà kubengangana ne muntu pa bìdiye wàmba, patwikala twètù katùyi mwà kucyènza mu mùshindù wà bwànà bwètù, ne dîbà adi . . . Nwamònu's, piikalabi ne Kilistò ùdi munda mwà mwoyi, dîbà adi nànsha wèwè mubèngàngane ne muntu mwine awu bishi, uciði ànu ne dinanga bwèndè yèyè ne kaneemu. Ntu mbèngàngana ne bantu bààbûngì, misangu yàbûngì. Kàdi nànsha nànkù, ncituku mwànji kumòna ùntù mubèngàngàne nendè ùndi ngeelela meeji makwàbò pa kuumusha “kumwela dibòkò dyànyì ku nshingù kwendè aku ne kumubiikila ne ‘mwanèètù wanyì,’ kuteeta kumwambulwisha ne mwànyì mwònsò mùndi naamù.” Ndi mbèngàngana nendè ku mēyì bwalu ndi ngeela meeji ne pàmwàpa pa kubengangana ne yèyè . . . Cidiye witabuujà aci, ndi mufwanyine kubenga kwitabuujà ànu bu yèyè, kàdi . . . ne bikwàbò, kàdi mpindyewu ndi mwà kuteeta kumuleeja wanyì mmwènenu ànu mudiye mwà kundeeja wendè, kubìsangisha byònsò pàmwè kubitaata ne kumòna citùdi naaci, kàdi ànu dibènga kupetangana ku mēyì mùshindù awu. Bìjikil'apu's . . . kabivwa bikengela twètù kufiikaku munda anyì kuswa kutapangana ku mwoyi, anyì kushimbula anyì nì ncinyì cyònsò to. Bìvwa bikèngela misangu yònsò ànu twètù kwikala tuteeta bwà kwibaka.

⁸ Tudi ne mashika makolè atùngùnuka munwemu, kí mmwòmò anyì? Degrés makumi àbìdi ne ìbìdi panguumùkù mu Tucson, ne pàbwedi dîbà ne kwìsù kufiikakù, kucivwa ànu degrés makumi àbìdi ne citupà. Pa nànkù, dîbà adi ngàlukila mùnwemu, kí mémè kuzakala mashika eku, nudi bamanye's. Ndi . . . Njila mujimà awu ne nêjè, kàbìdi degrés mwinshì mwà cijèngù, ne mâyì makwate mabwe ne byònsò, bìvwa bikèngela mémè kwibidilangana naabi cyàkàbìdi. Bìdi bikèmesha bikolè mùshindù ùdi mwà “kwibidilangana” ne mùdi kuulu ànu mu—mu ntàntà mukèsè nùnkù ewu. Kàdi kacya nganùshiya, ncivwa mupete mpùngà wa kwikala mupàndùke to. Mvwa mupetè ci . . . cyenze bu milubaluba mu—mu luyà lwà munwemu, ne bu mùndi ngènda nkulakaja . . . Pàànyì mvwa mulediibwe ne mukolèle

munwemu. Kadi paùdì, udi umona's, paùdì mwànà mutekète, udi ne cintu kampànda, udi mwà kukàndameena màsaamà; kàdi paùdì wenda ukola, mòna's, udi ùbanga kujandula ne cintu kampànda aci kacicyenàmu to. Kale wàwa, uvwa ànu mwà kubìpwa mwoyi's. Wèwè...kùdi cintu kampànda muntwamu cìdì—cìdì kacìyi mwà kukàndameena màsaamà muvwaci cyènza paucìvwa mwànà mutekète apu to, pa nàнку mèmè e kujandula mùshindù awu ne ndi...lupeepèlè lwà luyà alu, bwà muntu mununu, ndwenzè bu lùdi lwambulwisha ndambu.

⁹ Ndi mvùluka pàmvwà ngenda mpweka pa Utica Pike pàpa, bu mwànà wa (bidimu mwandamutekète, mwandamukùlù, dikumi, dikumi ne bibìdì, anyi dikumi ne binaayi), ncìyi ne bilatu ku makàsà (bisabaata byà tennis) pàku kwikàle degrés makumi abidi ne ibidi anyi makumi abidi ne isatu mwinshi mwà cijèngù, kadi bisabaata byà tennis, twànà twà nkasa tupatukemù. Kàdi kacìyi...mpindyewu aci kì nkupweka bu mu mùsèèsù emu to, kàdi kwenda kupicila mu nêjè. Kàkùyi mashinyi enda apweka, kuvwa kufwànyine kwikala kashinyi kàà ditemu kapita ku musangu ku musangu. Upweka ne cibebea aci mu dindà, ne kankooici kakesè kà kale pambidi, kuyi ne mutèèlù, ne ciine aci cikanga ne mpengèlè mùshindù *ewu*, kacìyi cipite cìndì muvwale mpindyewu eci to; mubolè bolebola ne mu binù, ntùngùnuka ànu ne diya ncìyi mbicyùka to. Nwamònu's, mmpuukapuuka bwà mèmè kupeta nànsha cimpumpu. Kàdi aci cìvwa kukaadi bidimu bitwe ku makumi anaayi ne bitaanu. Pa nàнку, mateketa búngì cyanààna, mwenza kilòmèètà yàbúngì ne muyambakaja pa cileejì cyà lubilul, nudi bamanye's, pa nàнку katwèna ànu tubìtwàla mutùvwà ne ciibidilu cyà kubìtwàla to.

¹⁰ Ngamònu Mwanèètù Capps ubàndululula mutù wèndè. Ucìdi mutàmba kwikala mwànà bwà kwela awu meeji mpindyewu. Ne nàнку anji indilà too ne pawàfikà kutùkààdi mèmè ne Mwanèètù Neville eku, dìbà adi—dìbà adi newìkalè—newèlè meeji ku bintu byàbúngì mùshindù mushiilàngàne, byenze bu wenda uteketa.

¹¹ Èè, tudi bapete bikondo byà dicyònkòmoka mu Mukalenge. Mukalenge mmutùbènèshe mu mùshindù wà dikema, ne ndi ne kusàkidila kwàbúngì. Nènku ndi ngàalukila, ngeela meeji, mu dyàlumingu dìlwalwà edi, bu Mukalenge mwà kwanyisha, ndi muswè ne, bu byòbì kabìyi mwà kutàcisha Mwanèètù Neville to, kùdi...Ndi ne disangisha, mu dindà dyà dyàlumingu nànsha bishi ne pàmwàpa mu dyàlumingu dilòòlò, disangisha dyà dyondopa bwà mu dyàlumingu dilòòlò. Mu dindà dyà dyàlumingu ndi ne diyiiisha dyà musinga mukolè, bu Mukalenge mwà kwanyisha bwà mèmè kudiyiisha. Ncyèna mwanjì kwela meeji àbúngì ku cyena-bwalu cyanyì to...ànu cyena-bwalu cyanyì ncìndì naacì, kakuyi dyumvwija pa bwalu abu to, bwalu mèmè—mèmè...ncyena ne—ncyena ne dibuulula dyà kudi Mukalenge nànsha dikese to, nudi bamanye's, kadi ànu mu mèmè mwine. Ndi—ndi muswè kwambaku cintu kampànda mu

dyàlumingu cîndi ntekemena ne necyàmbulwisheku ndambu mu mîshindù eyi.

¹² Bikèngela nye mpindyewu mu budimi bwà bwambi, nènkù pàmwè ne ditùkù ne ditùkù dyònsò didi mu ndongamu myaba mishiileshiilangane. Ngeela meeji ne Billy uvwa ungambila, mu ndongamu wa myaba ya kuya, ne mvwa ne matùkù àbìdì anyi àsàtù àmvwà mufwànyine kwalukila kumbelu mu ngondo mwinâyì paanyimà pàà mèmè mumane kuumukà kaaba aka, ngààlukila ku Tucson, ki pààku kumba kujika nànkù's. Ne pashîshe biya nànkù too ne ku ngondo wa dikumi ne umwe, ngondo wa dikumi, pàngààlukilà cyàkàbìdì ku luseke elu ngùmukila dyàmwamwa dyà mbù.

¹³ Mpindyewu, nkushààle matùkù àbìdì kumpàla kwa Noël. Nditùkù dimwè, kí mmwòmò anyi? Mmafwànyine kwikala àbìdì. Mu dimwè... Mu diibìdì ndyà Mulààdilu wà Noël anyi? Mu diibìdì ndyà Mulààdilu wà Noël. Kí mbibì bwà kumòna ne diikisha dinène edi, ditùdì tuseemena naadi pabwîpi edi, tudì tubwelamù mu mîshindù utùdì tubwelamù ewu anyi? Ncintu cìdì cyenza luse be, cintu cyà—cyà—cyà cimpàlàntàntà, bwà kwela meeji ne—ne tûlulù ne—ne bwalu bukwaterakaja bùdìbo babiikila ne, Kris Kringler, Taatù Noël, ne bikwàbò byònsò ebi, mbyumushe musinga mulelèlè wà cìdì Noël wikalangana.

¹⁴ Mpindyewu, katwèna... twètù—katwèna bamanye to, ne ncyà bushùwà ne ncyèna ngiitabuuja... Mvwa ànu ngènda mpweka, mukàjàànyì ùdì paanyimà pààpa, ne mèmè... pàmvwà ngènda mpweka ne njila, mvwa ngènda ntèèleja mulongi wa mabùlungà kampànda; bwà ne mpindyewu, bàpingànyì ku lungenyi lùvwà mulongi wa mabùlungà kampànda mungambile kukaadi bidimu byàbùngì, byàbùngì menemene, pàncìcìvwà ànu mulami wa diitu muneemu mu Indiana emu. Pàkangambilabo ne... mùshindù wàkadìsangisha mìtootò ayi, ànu mwàkangambila mulongi wa mabùlungù wa kumpàla awu ne yàkenza, cìdìbo bambe ne ncìfwànyine kwikala cintu cyà mu bufùki cìtu cyenzeka ku bidimu nkamà mwandamukùlù byònsò, ngeela meeji mwàmbye dilòòlò edi, anyi cintu bu nànkù. Nènkù cìdì cìdyènzulula cyàkàbìdì, ku: Sargas ne Jupiter, kàdì ngápù ne mwoyi's; ne Mart-... Mars; to, ndi... aci kí ncyòci to. Nyimwè yà ku mìtootò mùshindù ùdiyi yiya lubilu lukolè pàdiyi yìkosolola bijèngu byàyì mijaalàmàngane ne buloba, nènkù mulongi wa mabùlungà ewu dilòòlò edi ùvwa uteeta kwamba ne ncyà bushùwà ne civwa ncintu cyà mu bufùki. Mèmè—mèmè ncyèna—ncyèna ngiitaba aci to. Ndi ngiitabuuja ne civwa ncintu citambe-mfùkilu, cyàkenzà Nzambì. Yèyè, bintu byà Nzambì mbitambe-mfùkilu. Yèyè Mmutàmbe-mfùkilu.

¹⁵ Nènkù—nènkù mèmè kutuma mèsù panshi ne kumanya ne eci cìdì kukungamangana ne ngondo mwinâyì mpindyewu, Ndi ne... bu Mukalenge mwà kwanyisha bwà mèmè kwikala ne mwoyi ntanta bule nànkù, nèngiikalè ne bidimu makumi ataanu

ne bitaanu. Nwamònu anyi? Nenku ndi—ndi mumanye. . . Kadi pândi ntangila paanyima mu nsòmbelu wanyi, ndi ndikonka mùdìci cyenzèke. Kuumukila ku Noël mikesè yà kumpàla ayi, patùvwà tulembeleja nshèshetè yètù mile ku nshinga apu, ne maman mufwànyine kupeta. . . Tuvwa pàmwaapa mwà kupeta didimà òmwè dyà orange, ne tubonbons tubidi anyi túsàtuù twà mishoonyi mishoonyi, aci ke cìvwà Noël munène bwètù twètù. Kàdi, nudi bamanye's, bânà bôbò—bôbò bàtu bindila mapà awu ne mwoyi mujimà. Twètù—twètù tudi tujandula ne—ne Noël ùdi bwà. . . ùdi nangàngà bwà bânà, bôbò—bôbò bàdi bindile aci ne mwoyi mujimà matùkù aa. Mbi—mbishààle bwà bânà. Kàdi mu bulelèlè bìvwa bikèngela kwikalabi bwà bantu bakùlumpè; bavwa ne cyà kwikala balongesha bânà bààbò cidi Noël mulelèlè.

¹⁶ Ne mèmè ncyèna ngiitabuujaku to ne mwànyì mwònsò ne—ne Kìlistò mmufwànyìneku kulediibwa mu ditùkù dyà makumi àbìdì ne diitànù dyà ngondo wa dikumi ne mwibìdì, mu Yudaaya, bwalu kùdi mashika makolè kupita àdi mwab'ewu mpindyewu aa. Nwamònu anyi? Kaa, kàdi mmunyì mùvwà balami bàà mìkòòkò mwà kwikala bàlama bisumbù byàbò byà mìkòòkò bufùkù? Ne—ne pashìishe difuta dyà bitàdì ne bikwàbò byònsò, ne mùvwàbì bikèngela bwà Màriya kulwaye ntàntà buleyì, kuumukila ànu ku Betelehema kwàka kukabwela mu Yudaaya, too ne mu Yelusalema, eyowa's we, ku. . . bwa difuta dyà bitàdì. Mèmè—mèmè—mèmè ncìvwakù mwà—mwà—mwà kwitabuujà aci nànsha. Kulwa, ndi ngeela meeji ne wàkalwa ku Nazàlèèta, ne ki pàvwà. . . Mùshindù kaayi ùvwà—ùvwà aci mwà kwikala cyenjìibwe. Kacìvwa cìfwànyine kwikala—kwikala cyenjìibwe to, kàdi ndi ngeela meeji ne Kìlistò wàkalediibwa mu muvù wà bintu bitoloka, bwalu mu mìshindù yònsò Yèyè ùvwa Mwànà wa mùkòòkò. Nwamònu anyi? Mònaayi, Yèyè wàkalediibwa mu cikumbì, kacìvwa nzùbu to?

¹⁷ Nènku pààkaMufikishabo ku nkùrusè (bakwàbò abo), bwà ku dyètù pèètù dimanya, yèyè kààkakulaku bwà mùvwàYè mubàlombola to, kàdi Yèyè wàkalombodiibwa. Nutukù bamanye ne bìdì bikèngela bwà mwànà wa mùkòòkò anyi mùkòòkò kulombodiibwawù ku cishipeelu anyi? Wòwù—wòwù kawùtu ùdiyìila ku cishipeelu to, wèwè—wèwè ngudi ne cyà kuwùlombolakù. Nènku pa ciibidilu mbuji ngusòmbèla ulombola mùkòòkò. Mu—mu bikumbì bidìbò bashipeela nyama, badimù ne mbuji. Mbuji neèndele mu kajila aka, too ne mudiye utupika bwà kushiya mùkòòkò wènda ùpweka ne kajila aku bwà kushipiibwawù, ne pashìishe mbuji neàtupike uumuka. Kadi pàdìbò bafika pa dîbà dyà kushipa mbuji, ùdi udisuba menemene wènzà cimvundù (ùdi ne cyà kubwelamù) kàdi, mu bushùwà bwà bwalu, wèwè kwena mufwànyine kumudyula to. Kàdi—kàdi nci—ncintu's mudibi bikèngela bwà mùkòòkò kulombodiibwawù, ne Yèyè wàkalombodiibwa too ne ku

cishipeelu. BààkaMulombola. Úvwa Mwânà wà mùkòòkò. Nèku ndi ngiitabuujà mu mùshindù awu bu mùdìbi byònsò bufùki, ne bàna bàà mikòòkò bàtu balediibwa mu ngondo wa lwabanya nkàsu, wa cisanga nkàsu, anyi mwaba kampànda muntwamu, kî mpaanyimà pàà lumùngùlù nànsha. Kàdi ncyèna ngiitabuujà ne civwaku kumpàla kwà ngondo wa lwabanya nkàsu anyi nànsha kakesè paanyimà pàà ngondo wa lumùngùlù to, mmwaba kampànda munkaci amu.

¹⁸ Kàdi pàvwà èkèleeziyà, bwena Kilstò, busèlàngàne ne cyena Loomo, kuvwa nku Nsangilu wa Nicée, pààkiitababo . . . ditunga dyà beena Loomo dyàkiitaba bwena Kilstò ne kwenzabo cìdìbo babiikila ne ntèdeleelu wa buloba bujimà, uvwa bwena Kilstò. Kwenzabo ntèdeleelu wa buloba bujimà, ne bàvwa bakuukwila mpìngù, ne bàvwa ne nzambi-dìbà.

¹⁹ Nèku mpindyewu mene, kuumukila ku—kuumukila ku dyà makumi àbìdì ne òmùwè too ne ku dyà makumi àbìdì ne ataanu, dìbà ditu diimana pabwipi menemene ne njila wàdi pàdidi munkaci mwà kupita apu. Nudi nubiiikila ciine aci nè ncyini? Civwa . . . Mwawa ndyambidila ne mwawa mucimanye, kàdi ncyèna mwà kucivùluka to. Pàdi dìbà diikale—diikale . . . didi—didi dipeta cipòòlò cyà dìbà cyàbùngì ne dijimija cipòòlò cyà dìbà cyàbùngì, mu mùshindù wà ne dyà makumi àbìdì ne òmùwè, pankaci pàà dyà makumi àbìdì ne òmùwè ne dyà makumi àbìdì ne ataanu dyà ngondo wa Ciswà munène. Kaa, mèmè's ngápù mwoyi mùdìbo bàcibiiikila. Cinyi? [Muntu mukwàbò ùdi wàmba ne “Lundimbù?”—Muf.] To, lundimbù mpàdìci cipita, dìbà ne ngondo bìdi bìpita cyàpàmwè. Ncintu kampànda muntwamu, kaa, ndi—ndi—ndi naaci pa ludimi kàdi ncyi ànu mwà kucyàmba mpindyewu to. Nànsha nànkù, ndimana dyà kamùngùlù dyà dìbà adi didìbo babiikila kùdi Beena Loomo (ke dìbà òmùwè mu cipalu amu manayi kacya ànu mamòngane), civwa cibiiikidiibwa ne *mmufikilu wà dilediibwa dyà nzambi-dìbà*. Bavwa bàdisekelela kuumukila ku dyà matùkù makumi àbìdì ne òmùwè too ne ku dyà matùkù makumi àbìdì ne ataanu à ngondo wa Ciswà munène.

²⁰ Pa nànkù dìbà adi, bu mùvwàbi ne cyòci eci cyàkakùdimuka, Loomo kushààla . . . Bwena Kilstò bwakiitabiibwa, mu wàbò mùshindù mu Loomo, pashiishe kwambabò ne: “Netwènzè ditwà dyà cyanga òmùwèdimwè adi, ne kwenzà *mufikilu wà dilediibwa dyà Mwânà wa Nzambi*.” Nwamònu anyi? Nzambi-dìbà, mufikilu wa dilediibwa dyà Jupiter, dìbà adi mufikilu wà Mwânà wa Nzambi, mu matùkù makumi àbìdì ne ataanu a ngondo wa Ciswà munène, ne cyòci aci . . .

²¹ Kàdi ndishiilangana kaayi didi ciinè aci cyenza? Nwamònu's, leelù ewu patùdì . . . Nànsha cyòci ciikale . . . piikalàbo bacyenza mu ngondo wa Kashipu mpùmpùmpù anyi wa Cimungu wa mashika, anyi dìbà kanà òmùwèci mwà kwikala adi, cicidi ànu

bunsantu bwà kuvùluka ne “Nzambì wàkatupa ditèkemena ditùdi naadi munda mwètù edi.”

²² Nènku mpindyewu, wêwè udi wamba ne: “Èè, bakwabo bônso abu’s mba-Taatù Noël ne batungunuka ànu mudibo benza amu; mòna’s, s’tudi ànu bafwànyine kucyènza peetù.” To, mukalenge! To, eci kî ncibilù cyà bumpàngaanù bwètù twètù to, edi ndìbà dinsantu. Bu ne kakùvwakù Noël to, nùnkù kî nkulwè dibìka dyà ku lufù to. Bu ne kakuvwaku Noël to, nùnkù kakùvwakù kufwànyine kwikala dinanga to, kakùvwakù kufwànyine kwikala ditalala to, kakùvwakù kufwànyine kwikala matùkù àcilwalwà bwà mwena kwitabuuja to; bu kòkò kakùyi Noël’s.

²³ Nènku mpindyewu, wêwè udi wamba ne: “Èè, piikala bakwàbò bàà pa buloba, bàdi ànu . . .” Èè, nwamònu’s, mikenyi yà mvula myabùlùke, mu maulu à mavuba mafìke, yidi yileeja ne kùdi mwà kwikala bukènkè mu cikondo cyà mîdimà. Makènkè aa dilòlò edi àdi àjadika cyòci aci, ne kùdi mwà kwikala bukènkè mu cikondo cyà mîdimà. Ndìbà kaayi didi bukènkè bukenka bimpè menemene? Mmu mîdimà. Wêwè muteemeshe makènkè aa mundaamunya, pàdi dîbà dikenkesha apu, kwàkutàmba kumòna ne mmateemesha to. Kàdi ànu kaabukènkè, kâncing nekâkenkeshè kèlèlèè mu cikondo cyà mîdimà. Nènku ànu mpindyewu ki mîdimà nyôyi eyi cikondo cìvwà Mwena Kilistò yônso ne cyà kufila bujaadiki bwà ditekemena didi munda mwèndè, dyà Yesù Kilistò Mwànà wa Nzambi; Kî n’Kris Kringle kampànda wàkalediibwe kuntu kwàka nànsha, nudi bamanyè’s, ne mucì wà mùshindù kampànda ùvwa muteemesha ne kubwela naawù mu diitu butùkù kampànda, bwalu bulonda kampànda bufwikàkaja bùdi kabùyi mutù kabùyi nshìngù. Kàdi tudi twitabuuja bishindàmèène menemene pa Diyì dilaya dyà Nzambi dyà dilwa dyà Maasiyà, ne Wàkalediibwa mu ditùkù dyà Noël, makumi àbìdì . . . kukaadi bidimu bitwè ku binunu bìbìdì, mutùdi twitabuuja.

²⁴ Pa nànkù, dilòlò edi netwàkulè ndambù mu mùshindù mushiilàngàne. Ngeela meeji ne mpaasàtà wenù ukaadi mumane kwakula, pàmwàpa neàkule kàbìdì mu diisàtù dilòlò bwalu ndi—ndi mumanye ne yêyè mmutèèke cyena-bwalu kampànda anyì cintu kampànda ku luseka, bwà kumpàye cibumba cyà ku cyambilu eci dilòlò edi. Nènku ndi muswè bwà yêyè kucitwala, ndi muswè kumutèeleja.

Kadi, ànu kumpàla kwà twètù kwenza cyòci eci mpindyewu, twanjàayi kwinyika cyàkàbìdì mitù yètù bwà katanci kakesè kàà disambila:

²⁵ Taatù wa mu Dyulu, cikondo cinsantu cinène eci, patùdi twela meeji ku bintu bishiilèshiiilàngàne mu Mifundù eyi, ne mu myaba yônso yitùyaaya, mu Dipungila Dikulukulu, dyàkula

bwà ditùkù adi pààtùmà Nzambi Mwân'Èndè. Mùshindù mwine ùvwà baprófetà bàà kale wàwa babàkosele cyàbò cikondo bwà ciprófetà cyà Dìyì dyà Nzambi divwà ne cyà kulwa kudibo. Ne bàákamba ciprófetà mu matùkù àbò awu ne kudyanjila kwamba maalu àvwà mwà kwenzeka, nènku tudi tubimona byònsò muntwamu bitwilàngàne mu Betèlèhèmà dilòlò adi pàvwà Nzambi mutàmbe kunanga bàà pa buloba mu mùshindù wà ne Wàkafila Mwân'Èndè umwèpelè mulela. Tudi tuKwela twasàkidila bwà cyòci eci.

²⁶ Nènku mpindyewu, Mukalenge, dilòlò edi bu mutùdi tudilongolola mwaba ewu bwà—bwà kwakula pa Dìyì Dyèbè; ne Dyòdi ndyà cijila be, Mukalenge, kí bwà cinyi tudi baswè kwakula nebè Wèwè dyàmbedi. Nènku tudi tulòmba bwà Wèwè kukangula cyumvwilu cyètù ku Dìyì Dyèbè. Mu Dìnà dyà Yesù mmutùdi tulòmba nùnkù. Amen.

²⁷ Mpindyewu ndi muswe kubala ndambù wa Mifùndù kaaba aka, ànu bwalu bulonda bwa Noël bwà ciibidilu ebu, bwà Mufùndù bùdi bùsanganyibwa mu—mu Maatàayi, nshapità mwi2. Nènku panùdi nubuulula ku cyòci aci apu, ne Yone 3.16.

²⁸ Nènku dilòlò adi ku Phoenix...Nwènù bàdi balonda mikàbà yà mèyi mwab'ewu, nutèeleja mikàbà yà mèyi, ndi njinga bwà nwènù kutèeleja wòwò awu: *Bwà cinyi Yesù Ùvwà Ne Cyà Kulwa mu Betèlèhèmà*. Bwà cinyi Ùvwà ne cyà kwenza nànkù? Nènku bimfwànyì abi byà Davidi mwaba awu, mulàale ne—ne mwindila pa mukùnà, Mutàngile mwinshi ne umòna cilwilu cyà Beena Peleshète cidilonge ku mwalu wà mvità. Nènku mémè kufwànyikija aci ne leelù ewu menemene, ne kujandula ne Betèlèhèmà...cidiye ùmvwija's.

²⁹ Ne Kilistò ki wetù Betèlèhèmà, ne ndi mwà kujaadika ne muntu yònsò udi mulediibwe kùdi Nzambi mmulediibwe mu Betèlèhèmà, bwalu Kilistò's ki Betèlèhèmà. Nènku ki civwaYe, *Dyâmpà dyà Mwoyi*. Nènku Beth, *B-e-t-h* ùdi ùmvwija—ùmvwija “nzùbu,” *E-l* ùdi “Nzambi,” ne *e-l-h-e-m* ùdi *Elhem* udi ùmvwija ne “dyâmpà,” nènku “Nzùbu wa Dyâmpà dyà Nzambi.” Ne Yesù Kilistò ùvwà “Nzùbu wa Dyâmpà dyà Nzambi,” Dyâmpà dyà Betèlèhèmà wa Cyendèleèle. Ne muntu yònsò udi mulediibwe mu Kilistò, udi mulediibwe mu *Betèlèhèmà* ne: “Nzùbu wa Dyâmpà dyà Nzambi.” Ne mùshindù mwine ùdi nsangilu yà maèkèleeziyà leelù ewu midilonge ku mwalu wà mvità, bu beena Peleshète, bwà kupangisha bantu bwà kuKùfika.

³⁰ Ne mùshindù mwine wùvwà bantu bàà bukìtù abu, bamanye bimpè ne Davidi ùvwà mwediibwe maanyì ne ùvwà mwà kushàala mfùmù dîngà ditùkù...kayikù munangiibwa to ciine cikondo aci, bwalu ùvwà munyeemakanyi munkaci mwà bantu bèndè, kàdi dîngà ditùkù dibìikila dyèndè kulwadì. Kùvwà bantu bàà bukìtù pàmwè nendè. Nènku vùlukaayi ne, bantu abu bàvwa bàà Bisàmbà byà bendè, bààbùngì bàà kùdibo

bàwva bàà Bisàmbà byà bendè, cimfwànyì cilenga cyà leelù ewu. Nènku umwe ùwva wa bukitù bwà dikema, wàkashipa bantu nkama mwandamukùlù ne cìvwaye. . . ne difùmà dyèndè, yèyè nkààyèndè, mu ditùkù dimwè. Mukwàbò ùwva mwimàne mu budimi bwà bitèkùtèkù, ne cilwilu kulwaci, musumbà mujima. Kì bônso abo kuyabò mbilu, ki yèyè kwimana mwaba awu e kushipayè bantu too ne mwà kacýòkà mabòkò èndè. Nènku mukwàbò yèyè, mùshindù mwine wàkatupikilaye mu bwina ne kushipayè nyama wà ntambwe mu ditùkù dyà nêje, yèyè nkààyèndè. Nènku mwena Peleshè-. . . anyì mwena Ejiipitu kudyelaye kùdiye, ne difùmà dile, e kwangataye mulangala e kutuutaye difùmà adi kudyùmusha mu cyanza cyèndè, kwangataye difùmà ne kushebeyayè mwena Ejiipitu awu nkààyèndè, ne kushebeyayè baakàpìteenà nkama yisàtù.

³¹ Ne kumupèèsha bantu banène! Davidi kwela lubilà lukolè ne: “Ngàanwapu kàbidì màyi, nwamònu’s, à ku mushimi awu!” (kùvwaye ne ciibidilu cyà kunwìshila mikòòkò yèndè màyi pàvwaye upatuka mu dindà, yùmukila mu cikumbi, yivwa mifwànyine kwikala ne dijinga dyà kunwa màyi) Kàdi ke bantu aba kupatùlabò myele yàbò mu bimàngà e kulwànganabò mvità bàpìcila mu ntàntà wa kilòmèètà makumi àbìdi ne yinaayi yà bantu, e kutwàlabò màyi awu.

³² Ki Davidi kwambaye ne: “Kabimfikidiku to, bwà kuànwà.” Ki yèyè kuàpongololwelaye panshi bu mulambu wa byà kunwà kùdi Mukalenge. Ncimfwànyì cilenga kaayipù’s cyà cintu cimwècimwè aci, cyà Yone 3.16, dilòòlò edi.

. . . Nzambì wàkatàmba kunanga bàà pa buloba, mu mùshindù wà ne Yèyè wàkafila Mwanèndè umwèpelè mulela, . . .

³³ Kàdi cyàkenzà Kilistò ncinyi? Mwoyi ùwvawè ne cyà kwikala naawu Cyendèlèèle awu, Wàkaùpòngolwela panshi àfuma mu mijilu Yèndè, mwoyi Wèndè wà mu bufùki’s, mwela pa buloba bu mulàmbù wà mpèkaatù bwètù twètù. Ne mùshindù mwine wùdi bàà Bisàmbà byà bendè leelù ewu, bantu bàà luumu, bantu, bantu banène, bàngata mwele wà mvità, ne biimana mwaba awu ne benda badipandila njila bwà kapeta màyi matalàle à kunwa bwà Kilistò (wetù Davidi), udi kàyi munangùbwa kudi bantu leelù ewu to. Kàdi wetù Davidi, utùdi twètù bamanye ne Ùdi ùlwa mu bukolè, Yèyè neàdyatakaje ditùnga ne ditùnga dyònsò mwìnshì mwà makàsà Èndè mùshindù awu, ne kubàkookesha ne dikombo dyà cyamù cifike. Nènku bantu bàà bukitù bàà dikema, biimane ne Dìyi dyà Nzambì biikale bàtapa eku bàtapa eku kabàyiku ne bwòwà nànsha bukesè to, bwalu tudi bamanye ne Yèyè ùdi ùlwa mu bukolè.

³⁴ Tubalàayi mpindyewu, paanyimà pàà Yone 3.16; tubalàayi dikumbula dyà—dyà beena Meeji bàà mu Maatàayi Munsantu, nshapita mwi2.

Mpindyewu pàakalediibwa Yesù mu Betèlèhèmà wa Yudaaya mu matùkù à mfùmù Helòòde, mōnaayi, kwàkalwa beena meeji bàà ku—ku esètè too ne ku Yelusàlèmà,

Bàmba ne: Ùdi penyì yéyè udi mulediibwe Mfùmù wa beena Yuda awu? bwalu tudi bamòne mùtootò wèndè ku esètè, ne tudi balwè bwà kumukuukwila.

Pàvwà mfùmù Helòòde...muumvwe maalu aa, wàkatàcishiibwa, ne Yelusàlèmà yònsò pàmwè nendè.

Nènku pàakamanaye kukùngwija...baakwidi banène ne bafùndi bàà cisàmbà pàmwè, ke kubàkonkayè mwaba ùvwà Kilistò ne cyà kulediibwa.

Ki bōbò kumwambila ne: Mu Betèlèhèmà wa Yudaaya, bwalu mbifùndiibwe kùdì mupròfetà nùnkù ewu.

Nènku wéwè Betèlèhèmà, mu buloba bwà Yuda, wéwè kwèna mutàmbe bukesè ku bamfùmù bàà Yuda to: ...mu wéwè ki mwàpàtukila Nguvènà, wàkòòkesha cisàmbà cyànyì cyà Izàlèlèlè.

...Helòòde, pàakabiikilaye beena meeji mu musokoko, wàkabàkonka ne mbàbì yònsò dībà òvwà mùtootò awu mumwènèke.

Ki kubàtùmaye ku Betèlèhèmà, kwambaye ne: Ndaayi nukakenkètè ne mbàbì yònsò bwalu bwà mwànà mutekète awu; ne panwikale bamupetè, nulwe kummanyishaku kàbìdì, bwà ngààmòna pàanyì mwà kulwa kumukuukwila.

Pàvwàbo...pàakumvwabo mfùmù, bààkumwaka kuya; nènku, mōnaayi, mùtootò, ùvwàbo bamòne ku esètè awu, wàkaya kumpàla kwàbò, too ne mwàkayàwo kwimana mwaba wùvwà mwànà mutekète awu ùsanganyiibwa.

Nènku pàakamònàbo mùtootò awu, bààkasànka ne disànka dinène dyà diyiila ne panshì.

Nènku pàakabwelabo mu nzùbu amu, kumònabo mwànà mutekète awu ne Mariya mamwèndè, ne kuponabò panshì, ne kumukuukwilabò: nènku... bààkakàngulà máfwetà àbò, e kumuleejabò mapà; ngòlò, ...musenga wà kamonya, ne muulà.

Ne biikale badimwiijibwe kùdì Nzambì mu cilòòtà ne kabàvwa ne cyà kuya...kabàvwa ne cyà kwalukila kùdì Helòòde to, bàkaya mu ditungà dyàbò mu njila mukwàbò.

³⁵ Bwalu bwà dikema kaaba aka mùdì Nzambì, mu mùshindù mushààdile, ... Nzambì ùtu wàkula ne bantu ku bilòòtà. Mème

ndi nciitabuuja. Kàdi mùshindù mwine wùwà Nzambi mu cilumbu eci mukwate mudimu ne mùshindù mwibìdì's.

³⁶ Mpindyewu, cilòòtà cidi...cilòòtà, cyòci cyumvwija mu mùshindù mujaalàme, cidi mwomùmwe ne cikeènà-kumòna; piikalàci cilòòtà ne ciikale cyumvwija. Nzambi mmukwàte naaci mudimu kacya ànu ku Dipungila Dikulukulu ne munda mwà bikondo, ne wàkalaya mu matùkù à ndekeelu bwà kukwàta naaci mudimu cyàkàbìdì. Mpindyewu, bantu bàdi mwà kudyà kupicisha ne—ne bikwàbò ne kupeta bilòòtàlòòtà byà bufùkù, ne kabyèna—kabyèna bilòòtà bilelèla, byà nyumà to, kabyèna byùmvwijika mùshindù mujalàme to dìbà dyùdì—dyùdì ubibala. Nènku bìmwe byà ku byòbì abi mbifwànyine kumweka bijaalàme, kàdi nànsha nànkù kùdì bilòòtà bilelèla, byà nyumà. Ne tudi bamanye mwaba ewu ku tabernacle eku ne Nzambi ùtu ùfila bilòòtà ne bitu byumvwijiibwa, ne byenzeka, ne biikale bilelèla. Kàdi mmùshindù mwibìdì wà dicyènza. Nwamònu anyi?

³⁷ Mpindyewu, cyàkenzekelabi dìbà adi nànkù, mbwalu kakùvwa mupròfetà mu ditùngà amu pa diine dìbà adi to, bwà kuumvwija cilòòtà aci. Nwamònu anyi? Kakùvwa mupròfetà bwà kuumvwija bilòòtà, bu Yòzefù ne—ne Danyèlè ne bapròfetà bàà kale abu to. Kabàvwa bapete mupròfetà to kùkaavwa bidimu nkamà yinaayi, nènku Nzambi wàkakwàta mudimu ne cilòòtà bwà . . .bwà bukùbì bwà Mwan'Endè Sungasunga. Ke cyàkenzaYe.

³⁸ Wàkambila Yòzefù, bu muvwaye “muntu wa maalu malulàme, kàyi muswè bwà kumunyangila luumu kumpàla kwà bantu bònsò to, ùvwa wèlangana meeji bwà kumwipata mu musokoko.” Kakùyi mpatà to yèyè wàkamwambila dimumwenekela dyà Ngabudyèlè ne bikwàbò, ne civwàye mwambe; kàdi pàakamumònàye ne difù, civwa—civwa cyà pabwàci be. Nudi bamanye's, civwa ànu...civwa ncintu cishiilàngàne bikolè be. Nènku nudi bamanye, ke lutàtù lùdiku leelù ewu ndwòlò alu. Nzambi ùtu wenza bintu byà pabwàbì, ne mbyà pabwàbì mu mùshindù wà ne nànsha muntu mwakàne mene kèna mwà kubimònaku to.

³⁹ Yòzefù kavwa mwà kucyùmvwakù to, civwa citàmba kwikala cyà pabwàci. Ùvwa muntu mwìmpè, kakùyi cyà kumudyuwila to. Ùvwa muntu mwìmpè, muntu wa maalu malulàme, kàdi civwa cyà pabwàci be. Nwamònu's, pàmwàpa Yòzefù ùkaavwa ne bidimu makumi anaayi anyi makumi anaayi ne bitaanu, cintu bu nànkù awu, mùdibò bàmba, pàvwàbò yèyè ne Mariya babangilàngàne. Kàdi mwaba ewu tudi tusangana cintu kampànda citu kacya kaciyi cyànji kwenzeka nànsha: mukàjì mubangila kùdì mulùme ewu kàdi cìkòlà bamusangana ne difù! Nènku civwa cyà pabwàci mu mùshindù wà ne Yòzefù wàkeela meeji à kumwipata. Kàdi ànu pa dìbà mene dyà ntàpè-nkutàpe adi, Nzambi kutùma Mwanjèlo Wendè,

ne kumumwenekelaye mu cilòòtà wàmba ne: “Kuciinyi bwà kwangata Mariya mukàjèèbè to, bwalu Udiye mwimite munda mwèndè awu ngwa Nyumà Mwímpè.”

⁴⁰ Ndiitabuuja kaayi dipyadipyà òwà ne cyà kwikala dileedibwa mu Yozefù pàakajuukaye mwaba awu! Nwamònu’s, kàvwakù dijinga ne dyumvwija kampànda to, cilòòtà kacivwa mu bimfwànyì to. Civwa cipàtuke ànu buludi ne: “Kuciinyi bwà kwangata Mariya mukàjèèbè to, bwalu Udiye mwimite munda mwèndè awu ngwà Nyumà Mwímpè.” Kakùvwa mupròfetà bwà kufila dyumvwija nànsha, pa nànkù civwa ne cyà kulwa buludi, ànu buludi mùshindù awu; kùdì Nzambì . . . cyùmukila kùdì Nzambì ciya kùdì Yozefù. Mpindyewu . . . ne Nzambì wàkangata mùshindù mwibìdì awu’s.

⁴¹ Cidi citùlongeshakù cinyì ànu kaaba aka mene, kumpalà kwà twètù kulenga cyena-bwalu cyètù? Cidici citùlongesha ncyòci eci: ne Nzambì ùdì mwà kukwàta mudimu ne cyumvwilu cyètù kanà cyònsò cyà buumùntù bwètù cyòci cilàmbul- . . . cilekèlèèla kùdìYe. Yèyè ùdì mwà kukwàta mudimu ne meeji ètù, bilòòtà byètù, kandòndò kèètù, kondò kèètù kà mwoyi kàà kumpàla aku, ludimì lwètù, misambu yètù, mèsù ètù, ètù . . . Cyònsò citùdì naaci Nzambì ùdì mwà kukwata naaci mudimu piikalaci cilàmbùdìbwe kùdì Nzambì. Nwamònu anyi? Cyònsò cyùdì aci, cilambule kùdì Nzambì. Yèyè neàkwate mudimu ne kajila kwònsò ne citùpà cyèbè cyònsò, Yèyè neàkwate naaci mudimu. Nànsha cyòci ciikàle cinyì, Yèyè neàkwate naaci mudimu piikalaci cijidiibwe bwà kiipacila ne dibìikila dyèndè.

⁴² Mpindyewu, dilòòlò edi netwàkulè pa: *Mapà*. Nènku ndi muswè kwinyika eci, bu . . . Ndi mufunde, mufunde cintu kampànda muntwamu, pàvwà Mwanèètù Neville mwimàne ne: *Mapà à Nzambì Adi Misangu Yònsò Àpeta . . . Mapà à Nzambì Àtu Misangu Yònsò Ànu Àpeta Myaba Yàwù*. Mapà à Nzambì àtu misangu yònsò àbèngiibwa, kàdì àtu mu bulelèlè àpeta mwaba wàwù dìbà didì . . .

⁴³ Mpindyewu, tàngilààyì dipà dyàkasumba beena meeji abu . . . anyi dyàkaMutwàdilabo adi. Leelù tudi tusangana ne tudi tushintakajangana mapà. Muntu yònsò ùdì ne cyà kupeta dipà, ne kuteeta kudifwànyìkijila dikalà mukwàbò awu ne cyà kumupà, bwà wàmòna mwà kumupà cintu kampànda cyà musinga mufwànàngane. Nènku byòbì kabìyi nànkù to, èè, ditùku dyà Cidimu Cipyacipyà, ùdì ùdyùmva ne ùdì ne cyà kukùmbaka. Nènku muntu yònsò munkacì mwà kulonga ne kuditàcisha wenda ùtambakana panshi, beena ntèntè mu nzùbu ntèntè pambelu, mmunyi mwàpitàbo ne bwalu abu. Bàdì bafila búngi nùnkù kùdì *kampànda* ne *kansanga*, pàdìbì—pààbì mu kaabujimà mbibì. Bìdì—bìdì—bìdì—bìdì byònsò . . . Noël . . .

⁴⁴ Mòna: kùdì dipà ànu òmwèpelè dyùdì mwà kufila, ne dyòdì adi ngwèwè mwine. Udifilè wèwè mwine kùdì Nzambì bwalu

Nzambì ukaadi mumane kukupèèsha Dyèndè Dipà. Mpindyewu, kùdi cintu ànu cimwèpelè cyùdi naaci dibànza kùdi Nzambì, nkudifila wèwè mwine kùdi Ye.

⁴⁵ Mpindyewu, ne misangu yàbùngì, *mènà* àdi mu Bible. Katwèna tubimòna kàbìdì to, leelù ewu. Tudi... Misangu yàbùngì nukàadi banguumvumvwe ndyombola dìnà edi, dyà bânà babiikila... anyi bantu babiikila bânà bààbò ne “Ricky.” Mpindyewu, *Ricky’s* ndìnà dibì be! Nwamònu anyi? Nènku cìdì... kwèna ne cyà kubàbìkila nànkù to. Pawikala ne mwànà mwinyika ne Ricky, bwà luse, dishintùlùle dishaale cintu kampànda cikwàbò. *Ricky*, anyi—anyì *Elvis*, anyi cintu kampànda cyà mùshindù awu... *Ricky* mbwena kwamba ne “mpùku.” Nwamònu anyi? Ne pa nànkù udi—udi uya... Nènku—nènku dìnà dyùdì winyika muntu adi, dìdì ne bwenzeji pa yèyè. Inàbànza mutekète, ditùkù adi, ùvwa ne mwànà mukesè wa balùme pambelu pàapa uvwàbò bàbìkila ne “Ricky” ne dìnà dyèndè n’Ricky, James Ricky. Nènku bu mùvwàdi dyà mwasàkanaayi menemene (Ricky), bàvwa bamubiikila ne “Ricky.” Mémè ne: “Shintùluùlaayi dìnà adi!”

⁴⁶ Ndi mmòna bàmwè bantu basòmbe mwab’ewu mpindyewu mene biikale ne mwikùlù mukesè, ne dìnà dyèndè dìdì... umwe—kànà kàà balùme kakesè kàà kalolo, kalùmyànà kakesè kàdì kàsànkisha; ne mukwàbò n’Ricky, nènku ke cidiye ncyòci aci. Mutàngilaayi nùmònè, ngiikadilu wendè udi ànu mùshindù awu. Nènku yèyè... Mémè kwambila umwe wa ku baakakwendè, anyi muntu kampànda, mémè kwamba ne: “Ambila mamw’ende àshintulule dìnà dyà mwànà wa balùme awu, shintùlùlà wèwè ànu dìnà adi kàdì ùmonè cìdì cyenzekela mwànà awu.” Nwamònu’s, nwènù kanutu baswè kwitabuuja aci to. Tutu twela meeji ne aci nci tambe kwikala cya cyena-kale.

⁴⁷ Piikalàku kakùyì cintu mu dìnà to, dìbà adi mbwà cinyi cikondo cyònsò cìvwà Yakòbò ùbìikidiibwa *Yakòbò*, cìvwà cyumvwija ne “munyenganyani wa mwaba, museeswishanganyi,” s’ki cìvwaye ncyòci aci? Kàdì pààkalwanganaye mvità yà bibùlà ne Mukalenge bufùkù bujimà, ki Mukalenge kushintululayè dìnà dyèndè, ne pabwìpi ne... pàkaavwaye ne bidimu biipacila ku makumi àsambòmbò. Wàkashintulula dìnà dyèndè kudyùmusha ku—ku Yakòbò kudivwija *Izàlèlèlè*, “mwànà wa mfùmù kumpàla kwà Nzambì,” ne ki cìvwaye ncyòci aci.

Bwà cinyi Abram ùvwa ùbìikidiibwa ne... ùvwa ne cyà kubìikidiibwa “Abraham” kumpàla kwà mwànà kulediibwaye? Bwà cinyi Sarai wàkabiikidiibwa ne “Sarah” kumpàla kwà mwànà kulediibwaye?

Bwà cinyi Pòlò ùvwa... anyi kubìikila... dìnà dyèndè ùvwa Shawùlà, kàdì pàakatwilanganaye ne Yesù, Yèyè wàkamushintulula kuumuka ku Shawùlà kushààla “Pòlò.”

Pàvwà Simona mushintuluke Simona mushààle *Peetèlo*, cìdì cyùmvwija ne “kaadibwe kakesè.” Ne—ne mènà àbò ónsò àkashintuludiibwa, mbwalu dínà didìbo bàkubiikila adi didi ne ncintu kampànda mu dyòdì. Paùdì uteela cintu mu dínà, cìdì cìdimanyisha cyòci ciine. Ncyèna muswè kubwelamu to, bwalu aci cilwalwa mu dilòlò dyà dyàlumingu dilwalwà edi, nwamònu’s, dimanyishiibwa dyà dīyī. Nènku, kàdi mpindyewu, tudi tusangana bintu ebi bilelèlè ànu byà menemene.

⁴⁸ Mpindyewu tàngilààyì, Nzambì.. Ncintu kaayi cyà pabwàci dilòlò edi, pa kumòna ne bantu abu, Beena meeji, bantu balonge túlaasà, bantu banène.. bafumina ku Esètè, cìvwa m’Baabùlona, uvwa mwikàle Inde. Nènku kabàvwakù beendà ànu ciibufùku, byà ne bàbanga butùku kampànda ne bafika kuntwaku bùvwà bùlonda to byàkabàngata bidimu bitwè ku bibìdì bwà kafika kuntwaku. Kabààkasanganaku Mwànà mukèsè wa mu dibòko mu cidìilù cyà nyama to. Bààkasangana Mwànà wa balùme mutekète, Mwànà mutekète. Ne Helòode wàkashipa bânà kubangila ku bidimu bibìdì. Nwamònu’s, bwà kumanya ne kàvwa mmwànà mukèsè wa mu dibòko mulààdika mu kalààlu nànsha, biikala nànkù s’ùvwa mufwànyine kushipa ànu bânà bàà mu bònsò. Kàdi yèyè wàkashipa bânà batekète, bwà wàmòna mwà kutwishiiibwa ne mmuMupete, kuumukila ànu ku bidimu bibìdì too ne kwinshì. Wàkakosa cikondo aci bwalu ùvwa mumanye ne kàvwa muswe kushipa bânà bapitèpitè búngì, bònsò abu to, ùvwa ànu. . . bwalu bàvwa ànu bu bapika kùdiye’s. Úvwa muswe kupeta. . . kwikala mutwishiiibwe bwà kuMupeta, ki kwambayè ne: “Mwànà awu neikale ne bidimu bitwè ku bibìdì. Pa nànkù, byònsò kuumukila ku bidimu bibìdì kupweka, bishebeyayi.” Nwamònu anyì?

Nènku aci cyàkafikisha ku dikumbaja cìvwa mupròfeta mwambe, ne: “Mu—mu Laama nebùumvwe di—dyela dyà mbila anyì myadi, madilu; ne Lakèla udi munkaci mwà kudila bânà bèndè, ne kabàvwakù to.”

⁴⁹ Mpindyewu, nuvwakù bamòne ne beena meeji abu, bantu banène aba, bàvwa mu Baabùlona ne bààkamòna Mùtootò Wèndè, twètù kwamba ne: “Tudi bamòne Mùtootò Wèndè ku esètè ne tudi balwè bwà kuMukuukwila.” Bàvwa bafumina ku esètè, kùvwàbo bamòne Mùtootò, beenda baya ku wesètè. Bwalu Inde ùdi ku wesètè, ku nord-est kwà Baabù- . . . kwà—kwà Palestina. Ki kupwekabo buludi too ne ku Musulu wà Tigre ne kusabukabò bapicila mu mpàta kacya bàshidiimba ne mwàkabwelabo, kulwabò mu Betèlèhèmà mwàkasanganàbo Mwànà awu—awu—awu. Nènku vùlukààyì ne baa Yòzefù kabààkuumukakù mwaba awu to; bààkapweka buludi ku Nazàlèeta ne kukoleshilakù Mwànà awu, ànu mwaba awu.

⁵⁰ Mpindyewu, tudi tumòna mwab’ewu ne bààkaleeja. . . Bantu aba, biikale balongi bàà mabùlungà à muulu ne bàlonga mitootò, ne bàamòna makènkè à mu dyulu àvwà kaayi ùmvwika awu

àmwènekà kuntu kwàka, àleeja ne kùvwa cintu kampànda munkaci mwà kwenzeka; civwàbo bamanye ne m'Maasiyà, Mukòokeshi wa mauulu ne buloba awu—awu, ùvwà ne cyà kulediibwa. Ke kulwabò, bamanye ne Bunzambi bùvwa ne cyà kwikala buvùngila, munda mwà nzùbu mu mu—muntu; bwà kunùleeja bujaadiki bwàbò. . . Udi mumanye's, udi mumanye's, nsòmbelu webè ùdi wàkula bikolè kutàmba mèyi èbè, mu mùshindù wà ne nànsha wèwè mwambe cinyi, bantu mbamanyè cyùdi ku—ku cyùdi mwikale aci.

⁵¹ Nènku tàngilààyaaku bantu aba, beena Meeji aba, bàakaMutwadila. . . Tàngilààyì numòne mapà àkaMutwadilàbo, àleeja civwàbo beela meeji ne ke civwàYe. Bàakamutwadila ngòlò, musenga wà kamonya, ne muulà. Mpindyewu tàngilààyì numòne bimfwànyì ebi, cìndì muswè kunwàmbila mpindyewu. . . ncìdì bimfwànyì ebi biswa kwamba. Mpindyewu, ndì ne ndambù wa Mifùndù mifùnda mwab'ewu yitwikala mwà kubala ànu mu katancì kakesè cyanàànà pa bwalu abu, bu Mukalenge mwà kwanyisha.

Mpindyewu: ngòlò ne musenga wà kamonya, ne muulà.

⁵² Mpindyewu: ngòlò mu Bible. . . mùshindù mwine ùdiyì ùkùmbanangana ne Kilistò menemene, bwalu ngòlò ùdi wàkula bwà Bunzambi. *Ngòlò m*“Bunzambi.” Netùfikeku ànu mu katancì kakesè emu. *Musenga wà kamonya* ùdi wàkula bwà “mudimu.” Ne *muulà's* ke “lufù.” *Nzambi, Bunzambi, mu mudimu bwà kufwà.* Nènku ki civwàYe neyòci aci. Cintu ciine cyàkatwàlàbo ki civwà cileeja civwàbo beela meeji ne ncivwàYe.

⁵³ Nènku ndi ngamba nànkù bwètù twètù leelù ewu ne: “Bintu bitùdi tuMutwadila bidi bimanyisha cìdì meeji ètù bwà bwalu Bwèndè.” Nudi buumvwe cìndì muswè kwamba aci anyi? Nwamònu anyi? Pawikala. . . Wèwè muCitàbùùje ne mwoyi wèbè wònsò, Dìyì dyònsò dyà cyòci aci, neumanyishe nànkù ku difila dyà byònsò byùdi naabi kùdiCi. Nwamònu anyi? Kàdi wèwè mwitabuuje ne mmwaba mwìmpè wa kwikala muswikakane ne bantu batambe bwìmpè, mu èkèleeziyà ne bintu byà mùshindù awu, aci's ki cyùdi pèèbè ufila (ànu mèba makesè cyanàànà à nsòmbelu mulenga ne disangisha kampànda anyi cintu kampànda). Kàdi wèwè—wèwè muCiitabuuje bulelèlà ne mwoyi wèbè wònsò, dībà adi udi ufila byònsò bìdi mu wèwè ku Cyòci aci. Nwamònu anyi? Nènku cìdì cikumanyisha ne, udi mwitabuuje Mukenji bulelèlà, ne udi muwitabuuje ne m'Bulelèlà.

⁵⁴ Bantu bààbùngì batu bàmba ne: “Mémè ndi mwà kwitabuuja bintu bùngì *kampànda*. Ndi mwà kwitaabuuja *nànkù*.” Bayiidi. . . Ngeela meeji ne musangu wa ndekeelu kaaba aka, mvwa mwakulepù: *Beena kwitabuuja, Beena Kwitabuuja bàà Budingibudingì, Ne Beena Bupidya*. Ki mmwòmò anyi? Mémè. . . ncivwa mwakulepù mwab'ewu anyi? Nwamònu anyi?

Nènku muntu yònsò, tàngilàayi cipidi cyàbò. Nwamònu's, nebikafike mu mùshindù wa ne bàdi mwà kwangata ndambù waci, kabàyi mwà kwangata cidi cishààla to.

⁵⁵ Mpindyewu, mùshindù mwine ùvwà mapà aa àkùmbanangana ne lwendu lwà Kilistò pa buloba, Mwànà wa mu dibòko mulela pa buloba apa. Nènku mapà aa àvwà beena meeji abu baMutwàdile, àkakùmbanangana menemene ne mudimu muMutùma nawu kùdi Nzambi ne lwendu Lwèndè pa buloba.

⁵⁶ Mpindyewu, cintu cyà kumpàla: Nzambi. Ewu ùvwa Nzambi, Yesù ùvwa Nzambi mu mmwènèkelu wa muntu. Aci's ncikolele bantu bwà kuciminabo, nànsha leelù ewu, bwa ne "Yèyè ùvwa Nzambi." Nènku Yèyè...Ki civwàYe ncyòci aci. Yèyè kavwa mushàadile kùdi Nzambi mu kantu nànsha kàmwè to. Ùvwa Nzambi mumwènèshiiibwe mu mubidi. Yèyè ùvwa Mufùki mu bufùki Bwèndè Yèyè mwine. Mpindyewu aci...Yèyè ùvwa Mufùki mu bufùki Bwèndè, ku bufùki, bwà bufùki. Yèyè ùvwa Mufùki mu bufùki Bwèndè, ku bufùki Bwèndè, bwà bufùki Bwèndè. Byònsò bidi byàlukila buludi mu Nzambi, cintu cyònsò nkòong. Kanwènaayiku numòna anyi? Kaabujima kàà Nzambi! Yèyè nguvwa Mufùki mu mùshindù wà ne Yèyè ùvwa Nzambi. Ne Yèyè ùvwa Kampànda pa buloba (Kampànda wa cikondo), cidi ciswa kwamba ne Yèyè ùvwa ne cyà kwikala ne ntwàdijilu, ki bwà cinyi Yèyè wàkaDifùkila mubidi bwà kusòmbelamù. Nzambi, Yèyè mwine, wàkaDifùkila mubidi. Nwamònu anyi? Bwà ne ku bufùki ebu, Yèyè wàmòna mwà kusungila bufùki bùvwà bujimine bwàkafùkàYe abu.

⁵⁷ Kakwèna cintu nànsha cìmwè cidi muntu mwà kubùtula kumana to, kakwèna cintu nànsha cìmwè to. Kwèna mwà kwèna cintu nànsha cìmwè bwà kubutula butubutu nànsha ní ncinyi ní ncinyi to. Udi mwà kwangata kapese kàà dibèji ne kukwòsha, udi mwà kwòsha nzùbu kumubùtwila panshi, udi mwà kwòsha mucì kuwùpwila panshi; kwèna muwubutule mumanà to. Wèwè...luyè lùdì munda amu alu, kapyà kàdi kàtùdika aku, cidi ànu mishindà munkaci mwà kutùdika. Bidi munkaci mwà kwalukila ku civwàbi ku cibangidilu. Kí mbibùtùdiibwe bijimìna to. Wèwè mwashe citùpà cyà lukunyi (ne maalu a pa buloba, twàmbè ne, bu twìkala ne mwoyi mu Cyendèlèlè bu Nzambi, ne mishindà yidì mipàtùke mu lukunyi alu ayi ne kapyà aku byalùkile ku cibangidilu kwàbi ne byàci... mu cintu kanà cyònsò mùvwàbi bisanganyibwa amu, ditaayika dyà tupwishipwishi ne bikwàbò abi, bu—buloba, twàmbè ne, bwòbu bufwànyine kushààla mìliyò yà bidimu), bintu abi's mbifwànyine kwalukila cyàkàbidi buludi kàdi kwikala mucì mukwàbò, menemene ànu mùvwàwu amu's.

⁵⁸ Kwèna mwà kubùtula cintu nànsha cìmwè kucijimija to bwalu n'Diyi dyakula dyà Nzambi. Amen! Kaa, nènku aci's cidi cimbejea butèndeleeedi ne mu toonyi, mpindyewu. Nwamònu

anyi? Cìdi Nzambi wamba aci, Cìdi cishààla kashidi. Amen! Nwamònu's, kwèna mwà kubutula cintu kucijimija to. Twètù tudi citùpà cyà buloba ebu, ne katwèna mwà kubùtùdiibwa kashidi kashidi to. To, mukalenge. Mpèkaatù (musùkà) neàbùtudiibwe kujiminawù, tudi bamanye aci. Kàdi mu—mubidi utùdi basòmblemù awu, kawèna mwà kubutudiibwa to. Nwamònu anyi?

⁵⁹ Mpindyewu, ki bwà cinyi, Nzambi wàkaDifùkila mubidi. Yèyè ùvwa Mufùki, ne wàkafùka bufùki Bwèndè Yèyè mwine, bwà ne ku Bufùki ebu Yèyè wàmòna mwà kusungila aba bàvwà bajimine mu bufùki Bwèndè (ki wèwè awu ne mèmè, bifùkiibwa byà cikondo).

⁶⁰ Diyè Dyèndè—Dyèndè ndicileeje menemene ne... Yèyè ne byenzedi Byèndè byàkajaadika ne Yèyè kàvwa mushàadile kùdi Mufùki mu kantu nànsha kàmwè to. KwangataYe cipese cyà dyàmpà ne kucìcibula, ne kutùngunuka ne kucibula cipese cyà dyàmpà cimwè aci, ne kudiisha naaci bantu binunu bitaanu; ne kwangulabù bitungà mwandamutekète byùle ntèntè ne bipese bìvwà bishààle, ne muntu yònsò mwaba awu ùvwa mu—mu—muukute patapata ne màmpà.

⁶¹ KwangataYe mushipa e kucibula mushipa awu. Mpindyewu twètù bamanye ne Yèyè ngwàkafuka mushipa awu ku cibangidilu. Yèyè ngwàkafùka dyàmpà adi ku cibangidilu. Kàdi Yèyè wàkangata mushipa awu ne wàkacìbula mushipa awu. Ùvwa mushipa wà mwoyi, ne pashiishe kusabishiibwawù anyi—anyi kukàngiibwawù; ne musangu kanà wònsò ùvwaYe ùwùcìbula, cyònsò civwàwù aci (mwosha anyi mukàngà), ùvwa utùntumuka (kasunsa kàmwèkàmwè kàvwàYe ùwùcìbula aku) mushipa mukwàbò musàbisha anyi mukànga. Abi kî mbilenga bilaya anyi? Aci civwa cileeja ne Yèyè kàvwa cingà cintu cishààdidile kùdi Yèhowàh to. Ne pashiishe Yèyè ùvwa Mufùki ùvwa mwà kwangata bufùki Bwèndè Yèyè mwine, ne ku bufùki Bwèndè aku, kwamba patòoke ne Yèyè ùvwa Nganyi. Àlèluuyàh! Aci cyàkajaadika ne Yèyè nguvwa civwàYe aci. Yèyè ùvwa Bunzambi. Pa nàнку, ngòlò ùvwa wènda ulwa kudiYe, mu mulàmbù ku dilediibwa Dyèndè. Ùvwa Bunzambi buvwijiiibwe mubidi.

⁶² Ndi mufwànyine kwambaku cintu kampà...Kakwèna beenyi munkacì mwètù dilòlò edi to, ngeela meeji, pa nàнку... mu disangisha dyà milòmbò edi. Kàdi lekèlaayi ngàmbèku cintu. Yesù, pàvwàYe pànwàpa,...? Mpindyewu, eci mbwà kwela meeji, kî mbwà... pàmwàpa...kwenza londò's wè. Mònaayi, ànu bwà kwelakù meeji, Yesù wàkamba, mu Yone Munsantu 14.12 ne: “Ewu udi ungiitabuuja Mèmè, byenzedi bìndi Mèmè ngènta yèyè neàbyènzè pèndè ne neénze ne binène bipite ebi, bwalu Ndi nya ku Taatù Wanyi.” Nuvwaku bamòne aci anyi? Mònaayi, mpindyewu, awu uùvwa m'Mwànà wa Nzambi mwikàle ùlaya mwena kwitabuuja, ne bintu binène bitambe

byàkenzaYè, (mu matùkù à ndekeelu aa) bwà ne mwena kwitabuuja ùvwa mufwànyine kwenza bintu binène kutàmba byàkenzàYe. Yone Munsantu, nshapità wa 14, mvensa wa 12. Mmwómò anyi? Nudi nwitabuuja ne Yesù ngwàkacyàmba anyi?

⁶³ Mònaayi, pàakafùkà Yesù dyàmpà; Wàkangata cipese cyà dyàmpà, ne wàkafùka dyàmpà dikaavwà dimane kwikala dyàmpà. PàakafùkàYe mushipa; Wàkangata mushipa ùkaavwa mufùkiibwe dyàmbedi mushipa awu, ne kupàtula mukwàbò ku wòwò awu. Mmwómò anyi? Wàkangata màyi, àvwà mu mùshindù mushààdile mafwànyine kwandamuka mvinyò awu, ne kuènzà mvinyò. Mmwómò anyi? Kàdi tudi baMumòne munkaci mwètù, mu matùkù à ndekeelu aa, ùfùka ànu bintu bipàtuka, kakùyì cintu nànsha cimwè ciimane mwaba awu nànsha! Ncyà bushùwà anyi? Kufùka nshindì mwaba udiku kakùyì nshindì to. Cyà bushùwà! Kaa, Yèyè ùdi . . . ùdi ùshààla Nzambi. Yèyè ùdi Bunzambi ànu bwà menemene leelù ewu ànu mùvwàYe musangu awu ne kwònsò eku, anyi mwikalaye kashidi. Yèyè ùcidi ànu Nzambi, ne munkaci mwà kwela myoyi kadyòmbò bwà kuciitabuuja, “Bintu binène bitàmbe ebi, wèwè . . . kakùyì cintu nànsha cimwè cyà kukwàta ne kukosa to. Ücyàkulè, ne nebiikalè nànkù.”

⁶⁴ Mònaayi mpindyewu, tudi tusangana ne Byèndè . . . Wàkamanyisha. Byenzedi byàkenzàYe byàkamanyisha ne Yèyè ùvwa Bunzambi, byàkaleeja ne n’Yèyè. Bwalu Wàkamba ne: “Mèmè nciyi ngenza byenzedi byà Taatù Wanyi to, dībà adi kanùNgiitàbùùjì to.”

⁶⁵ Kàdi mwena Kilstò kènàku mwà kwamba leelù ewu ne: “Mèmè nciyi ngenza byenzedi byà Musùngidi wanyi to, kanùngiitàbùùjì anyi?” Nwamònu anyi?

⁶⁶ “Ànu mùdi Taatù muNtùme, ki mùNdi pàànyì nnùtùma.” Nènku piikalabi ne nudi benze byenzedi, byenzedi byà bufùki byà Taatù uvwa muMutùme awu abi, dībà adi’s mbufùki . . . Kilstò (Mufùki awu) udi utùtùma, udi wenza byenzedi byà Kilstò Mufùki. Nwamònu anyi? “Ànu mùdi Taatù muNtùme, ki mùNdi pàànyì nnùtùma. Nènku Mèmè nciyi ngenza byenzedi byà Taatù Wanyi to, kanùNgiitàbùùjì to.”

⁶⁷ Dībà adi bìdi bikèngela bwà mwena Kilstò leelù ewu kwenzaye Mwoyi ùvwà Kilstò mwenze awu cyanààna tudi ne bukenji bwà kwamba ne: “Kabyèna nànkù to.”

⁶⁸ Mònaayi mpindyewu, byenzedi Byèndè byàkaMufùka . . . anyi byàkaMumanyishisha Yèyè ne ke Mufùki. Byenzedi Byèndè byàkenzàYe byàkaasa cifulu cyà butùmbi ku bujaadiki bwà Mwoyi Wèndè, bwà ne Yèyè nguvwa “Mufùki”; kakùyì mùshindù wà kutùùkakanakù naaci to. Ki bwà cinyi, pàakalàmbulàbo dipà dyà ngòlò, bòbò bàvwà ànu mu dinwàngàna menemene ne Nzambi ne dipà dyàbò. KuMupàbo ngòlò, uvwa uMumanyishisha bu Bunzambi. Cifulu cyà butùmbi

misangu yônsò, cifulu cyà butùmbi cyà ngòlò. . . mutù wà ngòlò, wà Mfùmù Nebukandenèèsà. Byônsò, nudi numòna's, bidi. . . Bunzambi bùtu misangu yônsò ànu buleejiibwe kùdi ngòlò.

⁶⁹ Mpindyewu: *musenga wà kamonya*. Tudi baswè kubyàngata lùkàsàlùkàsà. *Musenga wà kamonya* ùdi “mulàmbù wà mudimu kùdi Yèhowàh.” Mpindyewu, nwénù baswè kufùndà Mifùndù eyi, Lewitiki 2.2, ne Lewitiki 16.6 too ne ku 15. Tudi tusangana ne aci ndíyì ditùma dyà baakwidi, bwà kufila mulàmbù kùdi Yèhowàh. Pààvwaye ùfila mulàmbù, wùvwa ne cyà kufidiibwa musambakaja ne musenga wà kamonya bwà mulàmbù wà mpèkaatù, bavwa bangata bintu bishiilèshiiàngàne ne bàbìsambakaja. Bwà mulàmbù wà bukula, bwà mulàmbù wà kunyukusha, musenga wà kamonya ùvwa ùsambakajiibwamù. Bwalu, ùvwa witabiibwa kùdi Yèhowàh wòwò mulaaba ne *musenga wà kamonya*, cidi cyùmvwija ne “mudimu wà Yèhowèh, Nzambi.” Nènku, mpindyewu, tudi tujandula ne Yèyè m'Bunzambi. Ki kuMutwàdilabò musenga wà kamonya, civwa cifwànyikijilu cyà ne Yèyè nguvwa mudimu wà Yèhowàh. Yesù mMusadidi wa Yèhowàh.

⁷⁰ Mpindyewu, mu Maatàayi Munsantu 12.15 too ne ku 21, tudi tusangana ne Yèyè ùvwa Musadidi wa Yèhowàh: “Mònaayi Musadidi wanyi, Mwena munda Mùndì musànkile” (ne ki civwàYe) “ne Ndi mutèèke dikàndà Dyànyì pambidi Pèndè.” Pa nàнку Mwoyi Wèndè ùvwa mulaabiibwe ne musenga wà kamònya, ku mudimu wà Yèhowàh. Ndipà kaayi òvwa bantu baa lungenyi abu bafile's wè! Nwamònu's, civwa ncintu kampànda bwà. . . di—dipà didibo bàfila adi, òvwa ncintu kampànda cyà kumanyisha Yesù bu Musadidi wa Yèhowàh.

⁷¹ Mpindyewu bu twètùku ànu mwà kwenza nàнку, bwà kumanyisha nsòmbelu yètù. Nwamònu's, nsòmbelu yètù bwà kwikalayi mimanyishiibwe bu musadidi wa Yèhowàh. Ke civwa mudimu wà musenga wà kamonya ncyòci aci, cyàkamwenza Musadidi wa Yèhowàh.

⁷² Mpindyewu, *muulà*, m-u-u-l-à, ùvwa “dilaabiibwa dyà lufù.” Tudi tusangana mu Yone Munsantu, nshapità wa 19, mvensa wa 39, ciikala ciya ku—ku mudimu wà ku citàlù cyà Yesù, pàakayà Mariya ne bakwàbò abu, bààkangata muulà ewu bwà kuMwelabò; bwalu Yèyè udi ne cyà kwikala Musadidi wa lufù bwà Yèhowàh. Nwamònu anyi? Byàkakèngela bwà muntu kampànda àfwe. Ki civwa mudimu ùvwa ne cyà kwenjiibwa bwà Nzambi, kàdi muntu nànsha umwe kavwa mukumbanyine kuwènza to pa kuumusha Nzambi Yèyè mwine. Pa nàнку, kutwàlà kwà muulà—muulà, kùleeja ne nè Bunzambi, ne mudimu, bwà ne Yèyè ùvwa kàbìdì mulabiibwe ne muulà; bwà ne Bunzambi ebu bùvwa ne cyà kushipiibwa bwà kusùngila ùvwa kayi mupwàngàne awu. Kaa, cintu bunène kaayipu's wè!

⁷³ Bufùki bujima bùvwa bujimine. Twàfumu ku dicikenketa mu Bitampì Mwandamutekète. Nwamònu's, bufùki bujima bùvwa bujimine, byònsò bikaavwa biye. Bìvwa bishààle byònsò byà Sàtaanà. Wakashààla mupyànyì wabì ne ùcidi mwenabì too ne mpindyewu. Ncyà bushùwà ne ùcidi naabi. Ki bwà cinyì tutu tulwishangana ne tupeta lutàtu lwònsò elu. Yèyè ngudi ukòntònona bumfùmù ne bumfùmù bwònsò; Sàtaanà awu's. Bukalenge bwònsò, mfùmù yònsò, bumfùmù bwònsò, bukòntònonyìbwe kùdì Sàtaanà. Buloba bujima mbukòntònona ne mbulombodìibwe kùdì Sàtaanà. Ki bwà cinyì tudi ne ntàtu yitùdì naayì eyi. Dìnà mulongi yònsò wa Bible ewu, anyì nì ncinyì cyònsò, ùdì mwà kukwambila ne Sàtaanà. . . Èè, Bible Yèyè mwine ùdì wàmba ne mmucyènzè, nwamònu's, ne yèyè ngudi ukòntònona buloba. Kàdì Kilistò neàshaale Mupyànyì wabù, bwalu mpindyewu Yèyè ùdì Mupikudi wètù. Nènku Yèyè wàkalwa bwà kupikula bufùki bujima, kàdì cintu nànsha cimwè kacìvwa mwà kucyenza to ànu Nzambi Yèyè mwine.

⁷⁴ Ki bwà cinyì Nzambi katu wènza cintu nànsha cimwè pàdiku kakùyì muntu to. Ùtu misangu yònsò ànu ukwacila mudimu mu muntu bwalu bìvwa bikèngela bwà Yèyè kukwàta mudimu ne muntu. Muntu ke ùvwaYà ne cyà kukwàta nendè mudimu bwà kuleeja patòoke cyambiùbwà Cyèndè cyà Musùngidi. Byàkakèngela bwà Yèyè kumwenza mu cimfwànyì Cyèndè, kumwenza cintu kampànda bu Yèyè, ne kumutèèka pa budìikadidì bwà kusungula ne kumulekela wènza mwònsò mùvwàye muswè bwà kwenza amu. Ùvwa ne cyà kwenza disungula dyèndè. Nènku Yèyè ùvwa mumanye ne muntu awu, ku dimupà dyà disungula edi, neàdishìndè. Pa nàнку bu mùvwàbi ne ùvwa ne cyà kwenza cyòci aci, ke kunyùngùlùkaYè e kwenza muntu mukwàci Nèndè wa mudimu pàmwè, ne Yèyè kèna wenza cintu nànsha cimwè pàdiYe kàyì ùcyenzela ku muntu to!

⁷⁵ Mudimu wònsò nkòong wa bupikudi wàkavwila kùdì muntu! Àlèluuyàh's wè! Lufù lwàkalwila kùdì muntu wa kumpàla, Mwoyi wàkalwila kùdì Adàmà mwibìdì. Nwamònu anyi? S'ki bwalu mbwòbù abu, Yèyè kèna wenza cintu nànsha cimwè to bwalu bìvwa bikèngela bwà Yèyè kukwàta mudimu ne muntu bwà cyòci aci, dìbà adi Yèyè ùdì ùkwàta mudimu ne muntu bwà kupikulaye cyàkàbìdì. Pa nàнку Bunzambi kulwabu Yèhowàh, anyì, Yèhowàh kulwa-. . . Yèyè ùdì Bunzambi, ne Yèyè wàkalwa mwà—Mwànà. Yèyè wàkalwa mu mmwènèkelu wa mpèkaatù, bwà Wàmòna mwà kupikula ngènzàmpèkaatù. Nwamònu's, ki cintu cyònsò mu kaabujimà ncyòci aci.

⁷⁶ Mpindyewu, tàngilààyì cìdì. . . mùshindù mwine ùdì mapà awu àkumbana mu Yesù Kilistò bilenga's; nwamònu's, ngólò, wàkula bwà Bunzambi Bwèndè. Mpindyewu, kabàvwa bampàngaanu to. Bàvwa basònsòdìibwe kùdì Nzambi. Kabàvwa bàdìfwanyikijila cintu kampànda to. Aci's cìdì cijaadika ànu mwaba awu mene ne, nànsha beena Meeji biine, bàakamòna

bushùwà Citàmbe-mfùkìlu. Bwalu dipà dyàbò mene, divwabo balàmbule adi, dyàkamwènesha ne kwakula bimpè bwà bujaadiki bwàbò ne bààkamòna Bukènkè Butàmbe-mfùkìlu. Bwà cinyi? Cìdi cyàkula mu mùshindù mupwàngàne menemene. Bààkatwàla *ngòlò*, “Bunzambì.” Bààkatwàla *musenga wà kamonya*, “mudimu.” Ne bààkatwàla *muulà*, bwà “lufù” Lwèndè, pàcìvwà Yè Mwànà mutòòke, amen, uleeja ne Bunzambì bùvwà bufwànyine kushipiibwa mu mubidi, amen, bwà wàmòna mwà kupikula muntu uvwa mudìshinde. Mmunyì mùdi bantu mwà kupeetula aci’s?

⁷⁷ Panùdi nufika ku dimanya ne: Citùdi twenza kaaba aka ncinyi? Tudi bafùme penyi? Anyì mudimu kaayi utùdi naawu patùdi mwaba ewu apa? Katùvwà batèèkiibwe pànwàpa ànu ku mpùükàpùùkà to, tuvwa batèèkiibwe pànwàpa bwà kiipàcìlà kampànda ne tudi ne cyà kukùmbàja kiipàcìlà aku. Kàdi nànsha nàнку tudi ànu baalùkile pa cishimikidi cyà budìshikaminyi bwà disungula kutùdi mwà kuCìkwàcìla mudimu anyì kuCibènga, ànu mwàkenza Adàmà ku cibangidilu amu.

⁷⁸ Ndi munkaci mwà kutangila, bânà bàà bakàji batekète aba, Mwanèètù. . . Ncinyi cìdi. . . ? Ngèèla meeji ne nyanàbànza mukèsè uvwa wimba cisanji cyà pyàno, ne mvwa—mvwa mmutèèleja pàvwàye wimba misambu apu. Tuvwa munkaci mwà kuyukila bwàbò, patùvwà tulwa mu njila. Nkaafamiye kakesè kàdi kalàmbule nsòmbelu wakù mujimà ne bikwàbò byònsò kùdi Kilistò. Tàngilàayi famiye awu, mùshindù mwine ùdiye mu bulongame’s. Tàngilàayi numòne bânà bàà bakàji batekète abu. Bavwa biimane mwaba ewu, ci—cileejilu cyà bukàji bwà nsongo, bwà bansonga. Nènku nànsha byòbì ne. . .

⁷⁹ Kukaadi ndambù wa mbingu mvwa muyè bu. . . Ncyèna mumanyè dìnà dyà mwaba awu lwà kwinshì kwàka to, mmu New York mpindyewu, mùdìbo ne bisòmbedi byà baamùyàpàndì amu. Mpindyewu, bânà bàà bakàji abu kuntwaku ne—ne tulàmbà tulamàtà pambidi ne—ne kakùyikù cingà cintu to ànu kààdiyò kàà màyi kàà kale kàà bakàji aku’s, mùdìbo bacibiikila amu, kumutù kwà ciine aci. Nènku, kaa, ciikale ànu nsangil-. . . Bàdi bènza cintu kanà cyònsò cìdi mu meeji àbò aci, nànsha cyòci ciikale cinyi, kí bwà cinyi—bwà cinyi mbaamùyàpàndì’s. Bàdi mwà kwenza cintu kanà cyònsò. Bòbò baswè kudyàdija panshi, kubènga kajuuka, bàdi ànu badyàdija panshi ne kabàyi bajuuka to. Bòbò baswè kuya, kenza cintu kampànda, bàdi bàcyènza; bòbò kabàyi baswè to, kabèèna bàcyènza to. Ànu, meeji àbò adi ànu munkaci mwà kulalakana! Kàdi meeji àdi kaayi makudimuke adi afika ku cinyi? Kwèna ne bukenji bwà kwenza nàнку to, bwalu kwèna ku bukòòkeshi bwèbè wèwè mwine to; udi musùmbiibwe kùdi Bunzambì, Yesù Kilistò, Mwànà wa Nzambì uvwa muvwijilbwe mubidi awu. Kàdi, nwamònu’s, cinkùtunkutu mùyòmbelè cyà mpèkaatù!

⁸⁰ Ne panùdì numòna nsongààkàjì mitekète, yà bitende mùshindù ewu miditápùlùla; mòna's, bwanyi mèmè, mbukênkè mu cikondo cyà mîdimà. Mbukênkè bwà mikenyi, bwà mfimbù udi utwa eku utwa eku wa Nzambì, mu mauulu bwà kuleeja ne kùdì mwà kwikala Bukênkè! Kùdì mwà kwikala bwakane munkaci mwà mpèkaatù!

⁸¹ Mariya mamwëndè wa Yesù, mu cimenga cyà Nazalèetà, cimenga civwà citàmbe kwikala cyà cikisu mu ditunga, kàdi mwômò amu Nzambì wàkasungula inàbànzà mutekète kampànda bwà kulelayè Mwan'Èndè wa balùme; citooyishidi, difù divwa ne cyà...Mwànà mutòoke uvwa ne cyà kuledibwamù. Yèyè kwangata muntu wa mùshindù awu bwà kucyenza. Nzambì ùtu ùkwacila mudimu mu bantu bwà kupikula bantu. Yèyè ùdi mwà kukwangata, kukwàcila mudimu kùdì wèwè bwà kupikula bukwàbantu, bu wèwè mwà kulàmbula byònsò byùdì naabi nkòong.

⁸² Pawikala mwànà wa bakàjì mutekète, lambulà nsòmbelu webè. Wèwè nsongàalùmè, làmbulà nsòmbelu webè, làmbulà meeji èbè, làmbulà ngeelèlù webè wa meeji, làmbulà mwoyi wèbè, làmbulà musùukà wèbè, làmbulà cyònsò cyùdì aci! Ne lekèlè Kilistò akwacile mudimu mu cyòci aci. Cintu kaayi cyà butùmbi's wè! Nudi ne misulu yà kusabuka, nudi ne bi—bilamba byà kusambuka, nudi ne—nudi ne bikàtà byà mèbà nudi ne bipuka byà mèbà, nudi ne meetu, nudi ne myaba yà mifitù, nudi ne tukùnà tutùmbùke, nudi ne myaba mitùmbùke yà kubànda. Cyùdì wenza ncinyi? Dìngà ditùkù ne bikèngelè bwà wèwè kwimana ne kutàngila paanyimà, bwà ùmonè mwaba wùdì mufùmìne, nènkù newùlumbulwishiibwe ku njila uwàlondà. Teeka byèbè—byèbè byònsò, meeji èbè ne ngeelèlu webè wa meeji, pa Mùtootò wa ku Nord awu (mpwilà màmbù wa Nzambì) ne kutentemukiKù to. Shààlaayi ànu naaCi. Necinulombole buludi mwakenzelaCi beena Meeji, buludi ne kùdì Kilistò.

⁸³ Èyo, bààkaMulaaba muulà. Tudi tujandula mpindyewu ne, mu Yone 12.1 ne 7, ànu menemene cyàkenzàYe. Yèyè ùvwa Musadidi mupwàngàne wa Nzambì, ne uvwa muMulaaba maanyi ne mapà Èndè ónsò à Bunzambì. Ùvwa mwediibwe maanyi ne mapà ónsò à Nzambì bwalu Yèyè ùvwa Nzambì. Yèyè ùvwa Nzambì. Nwamònu's, *bòbò* bààkaMutwàdila mapà.

⁸⁴ Mpindyewu, netwikalè...Mvw'a kujinga...Bantu bàdi apa aba misangu yònsò, bààbùngi bàà kùdìbo, nudi bamanye's, batu bàntumina cintu kampànda. Mpindyewu pàkaadibi bìkèngela bwà kwaluja, ncivwa mwà kucyènta to. Nwamònu anyi? Mpa buloba bujima. Ncyèna mwà kucyènta to. Nènkù ntu ngàanyisha ndambù wa...tuntu tukesè, ne bintu bidì bantu benza bwà kuleeja cìdì munda mwabò ne kusàkidila kwàbò ne bikwàbò.

⁸⁵ Mpindyewu, eci ki cìdì bantu babanji aba benze. Bantu aba mbeena Meeji, bààkasumba ngòlò, ngòlò mukezùke. Bààkatwàla

musenga wà kamonya, wà mutàmbe bwímpe ùvwàbo mwà kupeta awu. Bàakatwàla muulà, wa mutàmbe bwímpè ùvwàbo mwà kupeta awu.

⁸⁶ Tudi bamanye kaaba aka, mu Yone Munsantu 12, tudi tusangana ne mukàjì ewu . . . bu ne tuvwa ne díbà dyà kucìbala, kàdi ncyèna muswè kunùlama mukùngùlù mupitepite bule to, nwamònu's, bwalu ndi mumanye ne màalaba's ngwa dimwè, nènku nwènù. . . .bàmwè bàà kunùdì bàdi ne cyà kwenza mudimu. Tàngilààyì, bàakatwàla . . . Ewu—mukàjì ewu wàkatwàla muulà ewu, mananshi à musinga mukolè, bwà kuumusha naawu mupuuya wà lufù wònsò. Nènku wàkakangula mulangi ewu wà albatre ne kuwùtùnkumwina pa mutù pà Yesù. Ki Yudààsà kwambaye ne: “Mòna's, s'bvìwwa bikèngela bwà eci kupèèbwaci bapèlè.” (Yèyè ne: “Ki nne ùvwà ne kaneemu bwà bapèlè to, kàdi yèyè ùvwà mwìbì ànu kwine kwònsò aku, ùvwà mulame mfranga.”) Kì yèyè kwamba ne: “Aa avwa mwà kusùmbishiibwa, pamutù pàà kuèla . . .”

⁸⁷ Ki Yesù kwamba ne: “Mulekele kwèndè kwà tàlálà! Bwalu yèyè mwenze cyòci eci . . .” Kumwela Yè maanyi, bwà dijiikiibwa Dyèndè. Nwamònu anyi? Mukàjì ewu, ùvwà ne kusàkidila kwàbùngi bwà ne mpèkaatù yèndè yàkafwidiibwa luse mu mùshindù wà ne wàkatùlù mfranga yèndè yònsò yìvwàye naayi, Ne kwangata mulangi wà albatre e kuwùkangula ne kutùnkumwina maanyi awu kàdi e kushiya ànu dipembu mu cibambalu amu dyà mupiyà mwímpè wà muulà, ùvwàye muMwele bwà lufù Lwèndè. Mpindyewu, nwamònu's, yèyè wakenza mudimu awu kàyi mumanye ciwwaye wenza to, kàdi ùvwà ne kusàkidila kwàbùngi kùdi Nzambì.

⁸⁸ Nènku pawikala ne kusàkidila kwàbùngi bwà Noël, ki mbwà wèwè kwamba ne: “Ndi—ndi mupèeshe baaJones ditàpishi; ne kungalujilabo dikwàbò, nemmòne cingàpeta munda munda to.” Bwà cinyi kuyiku ukàngula mwoyi wèbè bwà kumòna ne ncinyi cidi munda amu, kujandula ne ncinganyi cyùdi naaci munda *emu* eci. Nènku kwitaba . . . twètù bamusangana munda mutupu, mwikàle ànu ne twitabààyì yà dipangila ne—ne—ne diditacisha bwà byà pa buloba, bwà cinyi kubènga kulomba Kilistò bwà kuwùja dilòlò edi? Dilòlò edi, bwà wamòna mwà kupeta dyumvwija dilelèlèlè dyà Noél. Cidi—cidi n'Kilistò munda mwèbè; Nzambì, musòmbèle mu mwoyi wa buntu. Ki cidi Noél mulelèlè ùmvwija ncyòci aci.

⁸⁹ Kàdi, nudi numòna's, leelù ewu tudi balwe beena bupidyà bàà dikèma. Ndyabùlù udi utùpicishila muntwamu, (mudi bònòbò yà ku mici, ne—ne mbudi ne—ne muntu wa myevu, mwikala ùbuuka mu lupepele bu mùdì ndeke amu, ne wenda ukumbula buloba bujimà ne kumbelu kwònsò ne dibùkì dyà tuupòpì paanyimà pèndè, ne ukumbula mwànà ne mwànà yònsò) ne cidi—s'cidi ànu mashimi! Cidi ànu, patòòke tòò, mashimi ètù à pa òwò. Nwamònu anyi? Mpindyewu, nwamònu anyi? Kàdi bwà cinyi?

Dyabùlù wàkenza nàнку bwà kumònyayè mwà kukònyangaja meeji à bantu.

⁹⁰ Bungèndààmùshìngà kudìbwinkamù ne bòbò...Mòna's, bàdi bapeta mfranga búngiyi mu cikondo cyà Noël mu mùshindù wà ne bàdi mwà kulekela mudimu matùku ónsò à cidimu àdì mashààla, pàmwè ne ónsò. Mvwa nyuukila ne ngèndàmùshìngà kampànda dīngà ditùkù, yèyè kwamba ne: "Wèwè mumpèeshe mbingu yìbìdì eyi, ne bu nciyi ne cyà kulama bantu bàànyì aba to," yèyè ne: "Mvwa mwà kwindila too ne ku Noël ulwàlwa; mvwa mwà kuya kalòba, anyi cyònsò cīndi muswè kwenza aci, too ne ku Noël ulwàlwa." Yèyè kwamba ne: "Kàdi ndi ndama ànu bānà bàà balùme aba." Kwambayè ne: "Kubàlama ànu mwab'ewu ànu bikùmbane bwà kulama màkàjiinyi àànyì makàngula ne ku—kufuta beena mudimu ne bikwàbò." Yèyè ne: "Ncyèna ne cīndi mpeta to ànu—too ne pààlwà Noël." Nudi numòna's, ncilwè cintu cinène cyà bungèndààmùshìngà mpàvwàbi ne cyà kwikala dikuukwila; dikuukwila.

⁹¹ Mpindyewu, Nzambì, wàkatàmba kulaaba Yesù ne cyuwidi Cyèndè Yèyè mwine mu mùshindù wà ne...Yèyè úvwa Dipà dyà Nzambì kùdì bàà pa buloba. Mu mùshindù wà ne beena meeji mbamanyishiibwe bitòoke too, ne bàdi bàlambula dipà dyàbò kùdìYe; bileeja ne mu mwoyi wàbò bàvwa bamanye ne Yèyè uvwa nganyì, ne civwaYe ne cyà kwenza bwàbò bòbò. Pa nàнку (kabyèna bikemesha to) ne cintu cyà kumpàla cyàkenzàbo, bàkapona panshi, bipwàngàne menemene mu bulongame, ne kuMukuukwilabò. Kumpàla mene kwà bòbò kucyùmvwà, bàakapona mikookwela e kuMukuukwilabo ne pashìshe kufilabo mapà abo awu. Awu ke mùshindù wà kwikala ne Noël mulelèlè: kuMukuukwila, pashìshe kufila dipà dyèbè; ufila mubidi wèbè bu mulàmbù ùdì ne mwoyi, wà cijila ne ùdì wànyishiibwa kùdì Nzambì.

⁹² Kàdi nudi bamanye mùdì bwalu anyì, paanyimà pàà beena meeji bamane kwenza nàнку? Taatù ne mamwèndè wa Kilistò...tatwèndè mudìishi (mu bushùwà bwà bwalu) ne kàbidì maamù, bwalu Nzambì úvwa byònsò bìbìdì tatw'Èndè ne mamw'Èndè. Kàdi tudi tujandula ne bòbò bààkiitaba mapà à kùdì beena meeji aba aa. Kabyèna bikemesha to pààkabiikidiibwabo ne mbeena meeji. Bavwa beena meeji. Bavwa mu bulelèlè...bavwa ne lungenyi. Bu bantu leelù ewu mwà kwikala ne lungenyi lwà mùshindù awu, ànu bu beena lungenyi! Bikèngela muntu wa lungenyi bwà kulwa kùdì Kilistò. Muntu udi uMukoma nyimà awu ncibulangeniyi. Kàdi bikèngela muntu wa lungenyi, bwà kulwa kùdì Kilistò.

⁹³ Mpindyewu mònaayi! Nèнку paanyimà pàà beena meeji biikale baMumanyisha civwàYe mwà kwikala, ne tudi tusangana mu Mifundu ne ke civwàYe menemene: Bunzambì mu mudimu bwà lufù. Bwà cinyi? Bunzambì mu mudimu wà Nzambì bwà lufù. Yesù úvwa Bunzambì mu mudimu bwà lufù, bwà

kupikula buloba. Kàdi bàà pa buloba bààkaMwenzela cinyi? BààkaMubènga. BààkaMulèngulula. Bwà cinyi? Bàmwè bàà kudibo, citùpà cinène cyà ku bôbò abu, bààkenzà nàнку bwà bwalu ebu: bwalu Yèyè wàkafwà bushùwà's! Bôbò kwamba ne: "Yèyè kàvwa mwà kwikala Bunzambi ne kufwà to." Muntu (mubidi awu) kàvwa Bunzambi to, kàdi Bunzambi bùvwa mu mubidi. Mubidi ewu ùdi ne cyà kufwa. Kilistò mwine udi munda mwèbè awu ki cintu cimwèpelè cìdi mwà kukubiisha. Ke Bunzambi mbwàbù, Nzambi munda mwèbè.

⁹⁴ Mpindyewu, m̀onaayi! Mpindyewu, byà mwomùm̀wè ne mpindyewu, bàdi bàbenga Bunzambi bujaadikiibwe. Nudi nucyùm̀vwa anyi? Ncyà bushùwà ne bôbò nebàfunde dìnà dyàbò mu mukàndà wà èkèleeziyà bàmba ne: "Nènteetè bwà kwikala ne mwoyi ku twitabààyi ewu." Nebàdìcipe ku cyôci eci. Kàdi pàkaadibi bikafiika ku diitaba Bunzambi, ne kuleeja patòoke dipà dyà mùshindù ùmwèùm̀wè mwàkenzabo. . .bwà ne udi umanyikila ku dipà dyèbè, dyùdi ufila buum̀ntù bwèbè bujimà kùdiBu, kùdi Bunzambi bumanyishiibwe. Dìbà adi udi udìmanyisha wèwè mwine ne Bunzambi, pa kufila cyònsò cyùdi aci, cyùdi aci, ku Bunzambi Bôbò bwine.

⁹⁵ Mpindyewu, Kilistò mu ditùkù edi, ditùdimu ne mwoyi mpindyewu ewu edi, ùcidi ànu Bunzamb-. . .bùdimanyisha Bôbò bwine: Bunzambi, munkaci mwà bantu. Yèyè ùcidi ànu Bunzambi, bwalu Yèyè ùdi Dìyi. Nènku patùdi tum̀ona Dìyi ne mwoyi Dyôdi diine, dìbà adi tudi tum̀anya ne muntu kèna mwà kwenza aci to. M̀Bunzambi, Dìyi diikale dimwènèshiibwe kù muntu. Ki Yesù kwamba Yèyè mwine ne: "M̀wànà kèna mwà kuDyènzela cintu nànsha cimwè mu Yèyè to. Ncyèna mwà kwenza cintu nànsha cimwè to, Ndi Muntu," mwàkambà Yesù. "Kadi Taatù Wanyi udi musòmbèle munda Mwànyi, Yèyè udi uNdeeja bintu byònsò bìdi Yèyè mwine wènza abi." Amen! Ki bwalu mbwòbù abu! Ncinyi ciine aci? Bunzambi bwikale bumanyishiibwe mu muntu. Mpindyewu, cintu cimwècimwè aci cidikù leelù ewu; Bunzambi abu, Dìyi dilaya bwà ditùkù edi, d̀idi mwà kuDimanyisha munda mwènù. Amen! Nànku filaaku bujimà bwèbè kùdiDi. Leeja ne udi muDiitabùùje. Udipe Bunzambi: ùDitabùùje, kwata mudimu, ne ikala mudìlongòlole bwà kufwà wèwè mwine ne meeji èbè wèwè mwine. Kàdi leelù ewu Dyôdi ndibèngiibwe mùvwàDi musangu awu amu.

⁹⁶ M̀onaayi, Nzambi wàkalombola beena Meeji abu ne mapà awu. Munda mwà bidimu pabwìpì ne bìbìdì, bààkalonda M̀utootò awu. Nwam̀onu anyi? Nènku aci cìdi cìleeja ne Cyôci aci kacìvwa mwà kwikala cimwè cyà ku bintu byà mu bufùki bivwà byenzèke to. Nwam̀onu anyi? Bwalu piikalà mitootò, mu dikosolola dyà bijèngù byàyi, bu yôyi mwà kwikala misambuke, yìvwa mifwànyine kuleeja ne kuvwa cintu kampànda cishiilàngàne. Bwalu. . .ànu beena Meeji abu ke bààkaCìmona, ntàntà mule kumpàla kwà kwenzekaci,

ne bàakamanya ne bivwa bikèngela bwà kusambukabo mùshindù awu; nwamònu's, mu tujila tùvwàbo balwila atu. Ki kusambukabo ànu mu Betèlèhèmà mwine musangu awu, kubangila ànu kwine aku, kumpàlampala, bamanye ne mibidi yà mu dyulu eyi yivwa yitentemuka mùshindù awu.

⁹⁷ Mpindyewu, Nzambì wàkalombola beena Meeji bwalu bàvwa ne mapà majaanàmè. Nzambì wàkalombola beena meeji abu bwalu bóbò mbàvwa ne dipà dilelèlè dimanyisha bwà kumanyisha Mwan'Èndè wa balùme. Kaaaah, ekèkèkè! Nudi bacyùmvwè anyi? Beena meeji leelù ewu, bàdi bajuuka mu Dìna dyà Mukalenge, kabàyi ne cintu kampànda cikwatakaja to, kàdi ne dipà didi Nzambì mulaye bwà ditùkù edi, ne Nzambì neàkulombole bwà umanyè ne Yesù Kilistò ùdi umwèumwè awu makèlèlè, leelù, too ne kashidi. S'ki bwalu mbwòbù abu: beena meeji!

⁹⁸ Nzambì wàkalombola mapà awu bwalu avwa mapà bwà kuMumanyisha Yèyè. Beena meeji, leelù ewu, bàdi mwà kuumusha mèsù ku bwena-èkèleziyà ne bintu byònsò byà pa buloba, bàtàngile ku Dìyi dyà Nzambì didi ne mwoyi! Nènku Nzambì neàmanyishe Mwân'Èndè ku Dìyi Dyèndè, bwalu Dyòdi adi ki cidiYe. “Mèmè ne Taatù Wanyì tudi umwe.” Ne: “Ku cibangidilu kwàkadi Dìyi, ne Dìyi dyàkadi ne Nzambì, ne Dìyi dyàkadi Nzambì. Ne Dìyi dyàkavwijilbwa mubidi ne dyàkasòmbela munkaci mwètù.” Ne Dìyi dìmwèdìmwè adi leelù ewu, Yèyè ùdi umwèumwè awu makèlèlè, leelù too ne kashidi. Nènku mwena lungenyi ùdi ùlonda Aci, bwalu Aci ncidi Nzambì ùcyùka bwà kuDimanyishila Yèyè mwine ku Cyòci aci. Amen! Dipà! Dipà dilelèlè, dimanyishiwbwè dyà Nzambì, Nzambì ùdi ùdibàndisha ùdipicishila mu byònsò mùshindù awu, bwà kuDimanyishilaku.

⁹⁹ Nènku mùshindù awu ngùvwà Kilistò mujaadikiibwe: ku ngòlò, muulà, ne musenga wà kamonya, kùdi bóbò bantu abu bidyànjlila kuleeja mu mundidimbi ne bileeja mu cimfwànyì civwà mwoyi Wèndè ne cyà kwikala. Nwamònu anyi? Bunzambì bumwèneshiibwe bwà mudimu, bwà kufwà bwà Wàmòna mwà kupikula ditùnga, bwalu Yèyè ùvwa ne cyà “kusungila cisàmbà Cyèndè ku mpèkaatù wabò.” Kàyi ùsùngila bàà pa buloba to, ùsùngila bantu Bèndè ku mpèkaatù wabò. Bible mmwambe mwab'ewu ne: “Bwalu mu—mu Dìna Dyèndè ke mwèyemena bàà Bisàmbà byà bendè.” Nwamònu anyi? Bàà Bisàmbà byà bendè nebèyemene Dìna Dyèndè. Amen! Mu ngaakwilù mukwàbò, Mukàjì-musèla, *babùkidiibwe bwà kupàtuka* mu bàà Bisàmbà byà bendè, nebiikalè bèyemena Dìna dyà Yesù Kilistò, “Mu Dìna Dyèndè ki mwikalà bàà Bisàmbà byà bendè ne cyà kweyemena.” Mpindyewu, Nzambì wàkabàlombola, bwalu bàvwa . . . mapà àvwàbo bàfila awu, àvwa akumbanangana ne cikondo.

¹⁰⁰ Mònaayi! Ànu mûngãmbì ne, Nzambi ùdi ne... Yêyè— Yêyè wàkaabanya Dîyi Dyèndè ku cibangidilu, mu Genèsè. Ndi mwà kwangata Genèsè ne kunùleeja cikondo ne cikondo cyônsò mu Bible emu, too ne ku cikondo eci. Tusùmbù twônsò twà ntèndeleele ne bikwàbò bitùdì naabi leelù ewu ebi, ndi mwà kunùleeja menemene mwaba uvwabi mu Genèsè. Nwamònu anyi?

¹⁰¹ Nzambi wàkafila Dîyi Dyèndè ndambù *apa*, ndambù *apa*, ndambù *apa*, bwà cikondo ne cikondo cyônsò. Kì pashìishe kutumaYè mupròfetà, mulaaba bwà kufikisha Dîyi adi ku dikumbana, ne òwva ditwa dikwàbò òwva dilwa adi nyama ku mikòlo. Nwamònu's, bu Maasiyà, misangu yônsò mutwibwe ànu nyama ku mikòlò. Mupròfetà yônsò mu nsòmbelu wendè yêyè, buumuntu bwèndè yêyè mwine, Dîyi òwvwa difidiibwe bwà ditùkù adi, yêyè wàkalwa ne wàkuuja Dîyi difùnda adi ne kudyànjila kwamba bwà òwvwa mukwàbò awu mwà kwikala. Nènku yônsò wa kudibo wàkaakula bwà bwalu Bwèndè (amen) bwalu Yêyè òwvwa kaabujimà, Yêyè òwvwa Mfùmù wa bapròfetà, Yêyè òwvwa Dîyi dyà Nzambi, Òwvwa bapròfetà abu. Amen! S'ki Yêyè awu. Mònaayi! Mùshindù mwine òwvwaYe mulenga: yônsò wa ku bapròfetà abu.

¹⁰² Pashìishe pàakalwàYe, Yêyè òwvwa kaabujimà kàà bapròfetà bônso, kamwenèshìibwe; bwalu bàvwa Dîyi dyà Mukalenge, ne Yêyè mwine wàkamba ne: “Panwikalà nubiikila bôbò abu banzambi, bôbò badi Dîyi dyà Nzambi dilwilè kùdìbo, mmunyi munùdì mwà kuMpìisha pàNdi ngamba ne ‘Ndi Mwàna wa Nzambi?’” Nwamònu's, nànsha mene bàà mu cikondo aci abu bàakamanyika ne mbanzambi, Nzambi wàkabàbìikila, Yêyè mwine ne: “banzambi.” Bàvwa cinyi? Bàvwa dimwenèshìibwa dyà Dîyi Dyèndè. Nènku ke Yêyè ewu, kaabujimà kàà Dîyi, Bunzambi bujingila mu mubidi, Bunzambi bumwenèshìibwe mu mubidi.

¹⁰³ Tàngilàayi! Bwalu mapà aa, àkatwàlà bantu aba, kabàvwa mwà kwikala baàtwàdile mupròfetà to. Kabìvwa bifwànyine kwikala bimpè to. Nwamònu anyi? Mapà awu kaàvwakù mwà kwikala mayè kùdì Eliyà to, kaàvwa mwà kwikala mayè kùdì Mòsà to, bìvwa bikèngela bwà kulwawò kùdiYe. Nènku bu mùvwàbi ne mapà awu àvwa menemene ànu bwà ditùkù adi, ne àvwa bwà kumanyisha ne Yêyè òwvwa Nganyì ku mapà aa, pashìishe ke Nzambi ulwàlwa ewu bwà kuMukùba. Kì kubalamaye, bidimu bibidì kuntwaku, too ne pàakapetabo Bukènkè Bupwàngàne. Mùshindù mwine udibi bikùmbànangane's wè!

¹⁰⁴ Ncintu cimwècimwè aci leelù ewu. Tudi ne bantu bàdi ne lulamatu, bantu bàà maalù malenga, bantu bashùwashùwàle. Kàdi, nudi numòna's, mu cyòci aci, nemùpàtukè cintu kampànda, cidì Nzambi mwenzenze misangu yônsò, bwà kumanyisha ditùkù edi. Edi nditùkù didi bintu ebi byambiibwe

bwà kwenzekabi. Kamwakwikala bantu bààbúngì to, ànu bakesè, bakesè menemene bààsùngidiibwà. Bible ngudi mwambe nàнку. Nekwikalè ànu dyanza òm̀wè.

¹⁰⁵ Yesù wàkamba Yèyè mwine ne: “Ànu mwàkadìbi mu matùkù a Noà, mwàkasùngidiibwà misùùkà mwandamukùlù.” Misùùkà mwandamukùlù, mu lu—lukòngò lufwànyikijiibwe ne elu elu. “Ànu mwàkadìbi mu matùkù a Noà.” Cìvwa ncinyi aci? Bantu banène, bapilùlùke, beena mudimu banène, biibaki banène, bintu byònsò byà bwena bìvwàbo naabi abi. Mbènze dishidimuka edi ànu bu dyòdi adi, bintu binène bìvwàbo naabi abi. “Nènku ànu mwàkadìbi mu matùkù à Noà, ki mwikalàbi kàbìdì ku dilwa dyà Mwàna wa Muntu.” Nwamònu anyi? Nènku Nzambì ùvwa ne Noà bwà kumanyisha Dìyì Dyèndè dilaya. Divwa dikùmbànàngàne ànu menemene. Bwatù bùvwa bukùmbànàngàne ne Dìyì dyà Nzambì òvwàye mwambe, ne Yèyè ùvwa mwà kubùtula bantu. Kàdi yèyè wàkasùngila bàvwàye mwà kusùngila.

¹⁰⁶ Mpindyewu, beena meeji aba, bàdi batwale mapà abo, majaadikiibwe. Mapà abo ki àvwà amanyisha ne Cìvwa ncinyi, nènku ki bwà cinyi Nzambì ùvwa ùkùba mapà awu mu ditàmbàkana dyònsò dyàkènzàbo adi. WàkaCilama too ne mwàkafikabo ne mapà awu, bwalu àvwà àkùmbànàngàna bwà cikondo aci. Èkèleeziyà wanyì ùdi ùmvwa aci anyi? Ki cìdì munkaci mwà kwenzeka mpindyewu aci's! Ndi ntèkemena ne kí ncinùpìte mutù nànsha. Bidi bikèngela bwà mèmè kucyàmba mu lusùmwìnù, bu nàнку's, nudi numòna's. Kàdi nudi numòna anyi? Bintu bìdì munkaci mwà kwenzeka mbikùmbànàngàne bwà ditùkù edi, Laòdikiyà. Ncikondo cyà dikùmbànàngàna, ke bwà cinyi Nzambì mmuCìkùbe. Nwamònu's, muCìfikishe buludi bwà kuDìmanyisha. Mapà, nànsha mwàkakengelaci lufù, cyàkatèèka dibwe dyà cilendwishi mu njila wabò. Ncikondo cyà dikùmbànàngàna, ncyà bushùwà, dikùmbànàngàna bwà ditùkù edi. Kì bwà cinyi Nzambì mmuCìkùba, mùshindù ùdiYe mucìkùbe awu. Yèyè neàCìkùbe, too ne mwàkumbana kiipacila Kèndè.

¹⁰⁷ Kaa, ngàkabala bwalu bulonda kampànda, bùdì bundwile mu meeji ànu katanci aka, bwà cintu kampànda cyà bu nàнку awu. Kuvwa cimenga cinène kampànda, muneemu mu ditùnga edi, ne. . . New York. Nènku cìvwa mmu mulàadilu wà Noël. Nènku kuvwa famiye kampànda mupèlè. Taatù mukèsè mukulakaji, ùvwa ne disaamà dyà cyàdì, nènku uvwa. . . ne mukàjèndè ùvwa ne disaamà dyà cyàdì. Bàvwà bapèlè. Nènku yèyè—ùvwa mwenzè ànu bu. . . Yèyè ùvwa mupòyòyònge ne pa nàнку muntu kàvwà muswè kumwangata ku mudimu bwà kumufuta to. Kavwa mulonge kàlaasà nànsha, ne yèyè—yèyè. . . bantu kabàvwa bamuswè to.

¹⁰⁸ Uvwa ànu mudyombòdiibwè, e kushààlaye mulalakanyi. Ànu. . . nudi bamanye cìdì mulalakanyi, ùdi ànu ùtwa kwàka

ùtwa eku ne—ne wangulaku cintu kampànda, ne wenda ùcisumbisha ku lubànzà ne ku lubànzà bwà kupeta cidìye mwà kupeta aci; tuumakàsà tukesè tudibo mwà kupeta ku cyôci aci, bateeta bwà kudiilakù. Ànu. . . bu mupaanyishi wa ku lubànzà ne ku lubànzà anyi cintu kampànda, mu museèsù; ùkasumba ndambù wa mpengèlà ne tushìngì ne tutaata twà ku minu, ne bikwàbò kanà byònsò bìdìbo mwà kufùdisha abi. Ne—ne kucyàngata, ne—ne pàmwàpa kusumba kabùkì kajimà aku ku dyèya dimwèpelè, ne kukàpànyisha ku cìcyelè cyà mèya ataanu; ne kupeta mèya ànaayi pa kabùkì kàmwè aku, pàmwàpa mu bule bwà ditùkù dijimà. Wèwè udi wamba ne: “Aci’s—aci’s ndifutu dinène.” Kàdi anjì elaayibi ànu meeji, byònsò bìvwaye mufwànyine kupànyisha mu ditùkù dijimà. Pàmwàpa kupeta mèyà makumi àbìdì, makumi àsàtù ku ditùkù, pèndè mwikale ne famiye.

109 Ki mu—mukàjì mutekète awu, bu muvwaye ne butekète, ki—ki kufwàye.

110 Nènku civwa ncikondo cyà Noël. Nènku kansongàakàjì kakesè aku, kàvwa kapetèle. . . ku didyà dibì, kàyi ne cyàkudyà cìmpè ne bikwàbò; e kupetaye disaamà dyà cyàdì, yèyè pèndè. Nènku ùvwa mwànà mukesè, ne bidimu bitwè ku mwandamukùlù, citèemà, anyi dikumi nànkù awu’s. Ne kacya kàvwaku mupete kaapòpì bwà Noël to. Nènku ki cìvwàye ukeba bu dipà kampànda, civwa nkaapòpì.

111 Nènku taatù, kàyi mukòkèshe bwà kumwondopesha to ne bikwàbò, ùvwa ne. . . yèyè—yèyè kumòna mwànà mukesè wa bakàjì awu ùjika mbidi lukasa, ki kuteetaye ne mwèndè mwònsò bwà—bwà—bwà—bwà kupetaku ndambù wa mfranga bwà kumupetela kaapòpì kàà Noël; bu yèyè mwà kupetaku ànu ndambù mukùmbàne bwà kumusumbìla kaapòpì kakesè! Nènku cikondo cyà Noël civwa cyènda cilwa, cikondo cyà mashika mabì kulwacì, mwànà mutekete wa bakàjì ewu kubangayè disaamà dyà bisùlùsulu, ne—ne yèyè kufwà, ànu mbingu mikesè kumpàla kwà Noël. Ki taatù, mu bushùwà bwà bwalu, ne mwoyi mucibùlùke, e kuyaye ku dikopo dyèndè kupàtulaye mfranga. E kutumaye meeji kùdì mwanèndè wa bakàjì mutekète awu, nènku ùvwa ùjinga kaa—kaapòpì mùtù bânà bàà bakàjì batekète amu’s. Nwamònu’s, s’mmaamù mutekète wènda ukola.

112 Nutu numòna mùtù mwànà wa bakàjì mutekète, uya ku kaapòpì, bwalu yèyè. . . awu’s ngiikadilu wèndè, yèyès—yèyès ùdì wenda ulwa maamù. Neikalè maamù dìngà ditùkù pìikalaye ne mwoyi ne bikwàbò byònsò. Nudi bamanye’s, ngiikadilu wèndè awu. Kì bwà cinyi mwànà wa bakàjì mutekète utu muswè kaapòpì kakesè, mmuswe kwikala ùkàbeja; bwalu ndekeelu wa byònsò, yèyè—yèyè mmaamù mutekète, mu mùshindù mushàadile, mmaa—mmaa—mmaamù mutekète.

113 Ne ùvwa ujinga kaapòpí kakesè, ne kavwakù mukàpete kacya kwònsò eku to. Nènku Papa uvwa mubùte byònsò bivwàye mwà kufùdishà bwà—bwà kumupetela kaapòpí kakesè. Nènku, pa nànkù, ki kufwàye.

114 Ke taatù kwenza bu mujimije lungenyi. Mukàjèndè ùvwa mwangaciibwe, mwanèndè mutekète wa bakàji awu kabidi, nènku meeji èndè avwa menze bu makafikà pa kaaba kampànda mu mùshindù wà ne yèyè—yèyè. . . ùcivwa—ùvwa uya kalààla dilòlò dyònsò mwikale wàkula ne mwànà mukesè wa bakàji ewu, nànsha mùkavwàye. . . mumana kujiika amu. Kàdi yèyè ùvwa wela meeji ne ùvwa—ùvwa wàkula nendè, ne ùmwambila ne: “Mpindyewu, Munanga wanyi, kabyàkunènga to, nènku Papa neàkutwàdile kaapòpí aka bwà Noël ewu. Nènku—nènku Papa mmukulaye kaapòpí, nènku mèmè—mèmè—mèmè nènkapètè.”

115 Ndekeelu wa byònsò, ki Noël kufikayè. Nènku, mu bushùwà bwà bwalu, s'nudi bamanye mùdibi. Babanji bavwa ne maafètes àbò—àbò manène awu; ne—ne tündeyà tuteema midilu, ne misumbà minène mitumbùke yà bantu mu maèkèleeziyà, ne baakula bwà Yesù ne—ne bikwàbò (èkèleeziyà ayi's), ne benza mìshindù kanà yònsò yà mishingà yà misà, dimba dyà misambu, ne misambu yà Noël ne bikwàbò byònsò. Kabàvwa bamanye civwà munkaci mwà kwenzeka paanyimà pàà kajila apu nànsha, paanyimà pàà byònsò ebi.

116 Kakwàcikwètù aka paanyimà pààpa, kàdi kàvwa mu yèyè to. Ùvwa muswè be bwà mwànà wa bakàji mutekète awu kupetayè kaapòpí aku, bwalu ùvwa mutàmbe kulòmba kaapòpí kakesè aka bikolè be. Ki kupàtukayè e kumusumbila kaapòpí kakesè kàà biteetela, kaacintu kakesè—kakesè, pàmwàpa kàà bicyelè makumi àsàtù; kaacintu kakesè kàà manyaanu kàvwaye musumba aku's, lwà ku mpengà kwà musèsù. Nènku bìvwa bufùkù bwà mashika bwà menemene, ci—ci—cipepèlè cyà nêjè aci munkaci mwà kutuuta, nêjè mwikale umata bikolè; ne New York, mwikala ànu ku mwelelu menemene wà màyi aku.

117 Ne misèsù yènda yùla zabazaba; ne bantu mu mashinyi àbò, manène à limousine awu. Ne maafètes a dikwàcika dyà maala, banwa maala bàtònkola nzàbà, dicyònkòka dyà dilediibwa dyà Kilistò ne dyà bintu bitùdì twamba dilòlò edi ebi, bateeta kwela meeji ne ki mùshindù mujaalàme wà kucyènza ngòwò awu's; bajikijila ànu tunyinganyinga twàbò twà kale atu mu dìnwa dyà maalà ne bikwàbò abi's, nènku aci—aci's ki mùshindù wà kucyènza. Bòbò bònsò. . .

118 Mvwa mwimàne mu makàjiinyi, ditùkù adi, nènku mukàji kampànda ùvwa wàkula bwà cyà. . . bânà bàà bakàji bàbidi bàvwa batwilangane ne bavwa baswè kumanya civwabo basumbile tatwàbò. Ki umwe wabò kwambaye ne: “Èè, yèyè. . .” Ùvwa mumupètèle kartò kajima kàà mfwankà wa mùshindù kampànda. Kàdi mukwàbò kwambayè ne mmumupètèle

cyàbitaanu cimwè cyà Wiski ne—ne dibùki dyà twârta. Mpindyewu aci cyôci kaciyi difila dyà dipà dyà civùlukilu bwà dilediibwa dyà Mukalenge Yesù Kilistò's we! Nènku ki mùshindù ngwôwù awu ùdìbi biya, nudi numòna's, cidi ànu mushiki munène wà bilôngò ne midilu yà Noël. Kacyèna ne Noël mu cyôci nànsha kakesè to.

119 Nènku tudi tusangana mpindyewu ne, mwine muntu mukesè ewu, ùvwa wènda ùlalakana. Nènku munda mwà mwoyi wèndè ùvwa mumanye ne mwanèndè mutekète wa bakàji awu ùvwa mufwe, kàdi nànsha nànu kuyaye kasumba kaapòpì aku. Ki yèyè kudyambidila ne: “Nèngǎnji ànu kwaswa lwendu, nèmmpupetè mwaba kampànda. Yèyè neikalè mu musèsù mwab'èwu nèmmpupetè.” Ke kwasayè lwendu.

120 Yèyè—yèyè kavwa mwà kudishima yèyè mwine to, mwànà wa bakàji awu kavwa kumbèlu mu kaamutàndà kakesè amu ne mu kalààlu kakesè, kasunsuke, kàà manyaanu aku to; kàdi, yèyè uvwa mujiikiibwe. Pa nànu, yèyè—yèyè uvwa mumanye. Ùvwa wela meeji ne neàmupetè mu musèsù amu. Yèyè ne: “Nèntungunukè ànu ne kwenda kuya.” Nènku ùvwa ànu wènda upweka upicila mu tujila atu, pàvwàbo bimba misambu yàbò yà disànka ne bàtùngùnuka apu. Nènku wènda upweka ne kajila, mwambule kaapòpì kakesè, kàà manyaanu aku; mukambule mu nkooi wèndè, lwà kuulu pa mwoyi wèndè apu, wènda wela meeji bwà mwanèndè wa bakàji mutekète awu.

121 Kàdi ndekeelu wa byònsò ke mpùlushi kampànda kumumònyaye, ne mpùlushi mwine awu ùkaavwa mulabule tukesè, ke kwasayè lubilu mu kajila amu e kukwàtayè muntu mununu awu e kumukùdimùnayè. Yèyè ne: “Cyùdì wenza apa ncinyi?”

122 Yèyè ne: “Ndi mwambule kaapòpì kakesè aka, mukalenge, nkàtwàdila mwanàanyi mutekète wa bakàji.”

123 Yèyè ne: “Èè, udi musòmbèle penyì?” Ki kumwambilayè mwaba wùvwàye musòmbèle. Yèyè ne: “Èè, wèwè's udi uya kule ne mwaba awu, s'udi mukwacike maala. Alukila mu nunku.”

124 Yèyè ne: “Mukalenge, mèmè—mèmè ncyèna mukwàcike to. Mvwa mulaye mwanàanyi wa bakàji mutekète ne—nemmupetele ditàbishì dyà Noël.” Ke kwambayè ne: “Dipà dikumbàne bwà mwána wa bakàji mutekète nkaapòpì kakesè.”

125 Ki yèyè ne: “Ngǎnji nkàmònebi tǔng.” Ki kumuleejayè kaapòpì kakesè, kàà manyaanu, kàà biteetela. Ne ùvwa mukambule mu ntanyi wèndè. . .pabwìpi ne cyàdì cyèndè, mukwate kaapòpì kakesè aku pàvwàye. . .Ki mpùlushi awu, mukwàcike maalà ndambù, yèyè mwine, kumusàkilayè ku luseke ne kwasayè lwendu. Muntu mununu kupwekayè ne kajila aku, ne nèjè ùlòka ne lubilu.

126 Nènku, èè, maafètes à mundankùlù kukosekawù. Pàakacyàbu mu dindà, nèjè ùvwa mulekelakù kulòka, dībà

dikaavwa dipàtùke. Ne pa nàнку bàdi ne cyà kwikala . . . bantu bwònsò buumukila mu maafesto àbò à disànka bàvwa . . . ne nêjè ku mitù yàbò kwònsò aku, buumukila ku dinwà dyà maala àbùngi ne ku cyanga cyà di—dilediibwa dyà Kilistò. Ne—ne bààbùngi bàvwa ne mèyi mapate ku mbila yònsò ya lukutuikutu ayi, mu byònsò bivwa bipitakana abi.

¹²⁷ Kàdi lwà kwinsi kwà kajila aku, kusanganabò muntu mununu awu. Kàdi pàakamukenketàbo, ùvwa ne kaapòpí kakesè lwà pabwìpí ne mwoyi wèndè. Ndi ncinka ne wàkatwàdila mwànà mukèsè wa bakàji awu dipà dyèndè adi. Wàkamusangana mu Buloba bùvwa kabùyi bwà panu ebu to. Yèyè—yèyè—yèyè wàkaya ne dipà adi. Divwa ndipà disunguluke. (Nzambi, mubanzi mu luse.) Nànsha nàнку cyàkamukengela lufù. Kakwènakù mùshindù mukwàbò pa buloba apa ùvwaye mwà kwikala mumupe dipà adi to, yèyè ukaavwa mujiikiibwe's. Kadi mùshindù ùmwèpelè ùvwaye mwà kucyènta, ùvwa ànu wà kuya mùshindù awu. Kaapòpí kakesè aku kakàvwa ne musinga wàbùngi to, ngeela meeji, kaapòpí kakesè kàà kwìsù manyaanu aku, kàdi kàvwa . . . ncinyi cyàkenzàye naaku? Kàkakùmbaja mulayi ùvwaye mwènze. Civwa bantu beela meeji pa bwalu abu nànsha ciikàle cinyi, byanza byèndè byà manyaanu abi pa kaapòpí kakesè, kàà manyaanu, kàdi cyà—cyàkakùmbaja mulayi ùvwaye mwènzele mwanèndè wa bakàji mutekète awu.

¹²⁸ Misangu mikwàbò bàsòmbele bàtàngila Èvànjelìyò bu kwimba kwà misambu, kunàya, kabàvwa baMuswè pàakaMutwàla Nzambi to, kàdi byàkuuja mulayi wà ne Yèyè ùvwa mwà kufila Mwànà Wèndè. Kàdi nudi bamanye mùdi bwalu anyi? Bòbò bààkaMulekela bwà kufwaye, bòbò paabo, ànu bu mùdi mulalakanyi kampànda mu mùsèèsù. Aci ncyà bushùwà menemene, bàkaMulekela ùfwa ànu bu mulalakanyi kampànda mu mùsèèsù. Ne leelù ewu bàdi bàMwangatè bu mulalakanyi mu mùsèèsù, kàdi Yèyè mmuujè cìvwaYe ne cyà kwenza. Yèyè uvwa Dipà divwà Nzambi mulaye bàà pa buloba.

¹²⁹ Dilòlòlò edi, ndekelaayi mMwangatè bu Musungidi wanyi mu mwoyi wànyì. Ndekelaayi nkungamangane ne lufù lwànyì, anyi nì ncinyi cyònsò aci, mùshindù awu. Mèmè ndi muMulaye mwoyi wanyi. Ndi muswè kuwùtwàla kùdiYe. Nànsha mèmè ne cyà kupìcila mu cinyi, byòbì bìkèngela mèmè kupìcila mu lufù, pìikalàbì bìkèngela bwà kungaasabò ku cingoma; cidì mwà kwenzeka nànsha cyòci ciikale cinyi, bàdi ne cyà kunkesa, kumbiikila ne “mupàle,” bintu byònsò, kwipaciibwa mu èkèleeziyà mikwàbò yà beena Kilistò ne bikwàbò, Ndi . . . ndipà dyà Nzambi dìndi mukwàte munda mwà mwoyi wànyì. Yèyè ngudi mudifile, ndi muswè kuMutwàdiladi.

Twìnyikààyaaku mitù yètù bwà katanci kakese cyanànà.

¹³⁰ Ndi ngàakula pa mapà masungùlùke, cìvwa ndipà disungùlùke bwalu mwànà wa bakàji mutekète awu . . . yèyè

ùvwa mwânà wa bakàjì mutekète, uvwa ne cyà kulwa, maamù mukesè (ncivwàye mufwànyine kwikala), dipà disungùlùke òvwa kaapòpì. Dipà disungùlùke òvwa Nzambì, Mufùkì, mwà kupèèsha bufùkì Bwèndè, Òvwa ne cyà kwikala Musungidi bwà kubùsùngila ku ngiikàdilù òvwbò busanganyibwamu. Ndi ndikonka, dilòlò edi, patùdì tuseemena pabwìpì ne Noël mpindyewu apa, nènku ndi ncinka ne ncifwànyine kwikala diyiiisha dyà ndekeelu ditùdì tuumvwa kuumukila ku mpindyewu too ne ku Noël, ambà ànu twètù bapete diyiiisha dyà ku tudyòmbà dyà kùdì muntu kampànda.

¹³¹ Ndi ndikonka, dilòlò edi, ní tudi biitabe Dipà didi Nzambì mutùlayè: Mwoyi wà Cyendèlèlèlè, bwà kwitabuuja Kilistò ne kupeta Nyumà Mwìmpè. Pawikala kuyi naadi to, udiku ujinga kwitaba dipà dyà Nzambì dilelèlè, dyà bushùwà dyà Noël, udiku mwà kwela cyanza muulu anyi? Amba ne: “Mwanèètù Branham, ncyèna—ncyèna mumanye to, ntu—ntu misangu mikwàbò muDìitabuuje. Nènku mémè nkààdikù mutangile bintu bìndì ngenza. Ne mu mùshindù kampànda, ndambu kakesè, ntu ndyèbeja.” Kanwikadi—kanwikadi kàbìdì ne mpatà to, balunda bàànyì.

¹³² Nwamònu’s, dîbà dikaadi—dikaadi dipite bikolè bwà kudibwinka mu kwela mpatà mpindyewu. Twikalààyì batwishùbwe menemene bwà cyòci aci. Amba ne: “Nsambidilèku, Mwanèètù Branham, ne ndi muswè bwà... Dipà dyà Nzambì kùdì bàà pa buloba, n’Yesù Kilistò. Ndi—ndi—ndi muswè bwà ewu ikàle Noël wa cyà bushùwà. Ndi ngiitaba Nyumà Mwìmpè munda mwà mwoyi wànyì. Aci cidì mwà kunkùba bìmpè mu bipeepele bikolè byònsò byà mwoyi, ne dîngà ditùkù ndi mwà kubwela mu Bwikadi Bwèndè ne dipà dyà Mwoyi wà Cyendèlèlèlè edi. Yèyè neàngiitabile pa nshindameenu awu, ke mùshindù ùmwèpelè wàcyènzaYe’s.”

¹³³ Anyì, udi ne dipà dijaalàme dilòlò edi anyi? Lwidì lwà mùshindù mujaalàme? “Taatù, nènKulondè kwònsò kùyaaya Wèwè aku. Cyònsò cyùdì Wèwè wamba ne: ‘Enza’ aci, nèncyènzè. Cyònsò cidì Dìyì Dyèbè dingambila ne: ‘Enza’ aci, nèncyènzè. Èyowà’s, Mukalenge, nànsha muntu mukwàbò kanà yònsò wamba bishi, mémè nèncyènzè bwalu ndi muswè Dipà Dyèbè; didi Mwoyi, ne Kilistò ùdì Dìyì.”

¹³⁴ Pawikalà kuyi mwà kwitabuuja Dìyì dyònsò, kàdì wamba ne: “Èè, ncyèna mumanye to, ndi—ndi ngiitabuujà ne... *cikampànda*, ndi ngiitabuujà *cikansanga*, kàdì ncyèna ànu mwà kulonda *cikampànda* to, ncyèna mwà kulonda *cikankenga* to.” Udi ànu bu makumi mwandamutekète bààkayà abu. Kabèèna mwà kwitaba Dìyì dyònsò bwà kupeta Kilistò mu kaabujimà kàà Bunzambi Bwèndè ne mudimu Wèndè to; ne mudilongolole bwà kufwà bu mwàkafwàYe bwèbè wèwè amu.

¹³⁵ Dìbà adi udiku mwà kuswa kwela ànu cyanza cyèbè muulu, ne mutù wèbè mwinyika, wamba ne: “Nsambidilèku” anyi? Nzambi àkubènèshè. Nènku Nzambi àkubènèshè. Nzambi àkubènèshè. Nzambi àkubènèshè, mwànà wa bakàjì mutekète. Kaa, Nzambi àkubènèshè. Èyo, ndi mmòna cyanza cyèbè. Mukalenge àkubènèshè, cyà bushùwà. Kaadipà kakesè aka, kàà Kilistò aka, kàdi Nzambi mutùmine bàà pa buloba; ne muDìmanyishe ku... beena Meeji bààkaDìmanyisha, nsòmbelu Wèndè Yèyè mwine wàkaDìmanyisha, lufù Lwèndè lwàkaDìmanyisha, dibìikà Dyèndè dyà ku lufù dyàkaDìmanyisha, diitàba dyèbè dyàkaDìmanyisha, ne Yèyè ùdi uDìmanyisha Yèyè mwine kùdi ne wèwè udi Wèndè ne Yèyè ngwebè. Pawikala kùyi bulelèlà... nwamònu’s, dibindùlùka dyà Nyumà wa Nzambi ùkwàta mudimu munda mwèbè, mu muvù wà Noël ewu, swàku bwà cikuvwile mpindyewu.

¹³⁶ Taatù wa mu Dyulu, patùdi twenda tutetuka mùtù mulalakanyi mu mùsèèsù amu, muntu nànsha umwe kavwa nendè bwalu nànsha kakesè. Bàà pa buloba bàakaya ànu buludi mu bibilù byàbò byà macimbu, ki mùdibo kàbidi dilòòlò edi, Mukalenge. Kàdi mînga misangu tutu tudyùmva bu mulalakanyi awu, kàdi tudi biitabe Dipà kampànda. Pa nànkù tudi tulòmba, Taatù, bwa Wèwè kutuvwija dipà, dyà bukènkè, bwà bàà pa buloba bàdi munkaci mwà kupunga ne lufù aba. Bààbùngì kaaba aka mbèèle byanza byàbò muulu ne mbaswe Dipà dyà Nzambi bwà ne Yèyè mwine, Úvwa ne cyà kufila Mwan’Endè umwèpelè mulèla, wàkapwèka panshi, e kulwa Muntu. Wàkashààla wa ciipanshi bikolè mu mùshindù wà ne bòbò kabàvwakù nànsha... Wàkalwa wa ciipanshi menemene ne wa didipwekesha mu mùshindù wà ne Yèyè—Yèyè kàvwakù nànsha ne bulààlù bwà kulediibwamù to. Byàkakèngela bwà—bwà—bwà ngombe ku... anyi byàkakèngela bwà kabalu anyi cintu kampànda kufilaci cidilù cyàci, kushiyaci kaaba, (nyama) bantu bavwa batàmba kubwela mu ngiikadilu uvwakù awu. Yèyè—Yèyè wàkapwèka mu—mu cidilù cyà nyama, kaacikumbi kakesè kàà kale kàà mu nyongolo kàvwà ku luseke lwà kakùnà aku mu Betèlèhèmà, mùvwà mwànà wà balùme wa ndumba kampànda mwàsè cimenga cikesè bidimu byàbùngì kumpàla.

¹³⁷ Nènku mpindyewu, Mukalenge, tudi tujandula ne dilòòlò kampànda, dyà mashika, bàvwa baMwambile ne: “Laabi, tudi baswè kwalukila Neebè kumbelu dilòòlò edi.”

¹³⁸ Ki Yèyè ne: “Èè, mpindyewu, nyuunyi yòyi yitu ne maswa, ne—ne miwbàbwà yitu ne meena, kàdi mèmè—mèmè—mèmè ncyèna ne... nànsha mwaba mwine wa mèmè kutèèka mutù to.” Nènku ke mùshindù awu wàkaMulekelàbo úfwa, mwenze bu mùdi mulalakanyi mu mùsèèsù.

¹³⁹ Taatù wa mu Dyulu, mwena Kilistò—udiku mwà, bantu leelù ewu bàdikù mwà kumòna ne—ne Adi n’Dipà dinèna adi anyi? Ne bààbùngì kaaba aka, dilòòlò edi, bapite ne pa dikumi ne

bàbìdì, ngeela meeji, mbèlè byanza muulu bwà ne bàvwa bajinga kupeta Nyumà Mwímpè. Biikaleku ànu mùvwà beena meeji amu, pàmwàpa kakwàkwikalakù nànsha umwe wa mu disangisha emu wàmòna cìdì munkacì mwà kwenzeka to. Nènku Mùtootò ewu, Bukènkè budi kabùyi buumvwika ebu bwàkapita nùbù yà dijoojela ayi, munda mwà bidimu bibìdì bijima, mwaba mene ùvwà bantu bàmanyina dîbà ku bilù binaayi, bavwa bàmanyina dîbà ku mìtootò. Muntu nànsha umwe, mufùndi wa maalu-malonda nànsha umwe kàtukù mufundepù bwalu to. Muntu nànsha umwe kàvwakù mumanye kantu nànsha kàmwè pa Cyòcì aci to, kàdi's Cìvwa ànukù. Nènku beena meeji aba, ne dipà dyàbò disungùlùke, bàvwa balombodiibwe buludi too ne ku Cyòcì aci. Swàku bwà Bukènkè bùmwebùmwe abu bubwele munda mwà mwoyi ne mwoyi wònsò, mwab'ewu dilòòlò edi, ùdì musòmbe mwab'ewu ewu. Kùdì mwà kwikala kakùyi disaluka nànsha dìmwe to, kùdì mwà kwikala kakùyi *cikampànda*, *cikansanga*, ne pàmwàpa muntu mukwàbò nànsha umwe kayiku mufwànyine kucìmanya to, ànu mùvwà beena meeji abu amu. Kàdi swàku bwà cintu kampànda cìshikikiibweku mu balùme, bakàjì, bàna bàà balùme ne bàà bakàjì aba dilòòlò edi, bwà Dipà dyà Nzambì adi dyàlaabaku mwoyi wàbò. Bwà ne kuumukila ànu ku dilòòlò edi, baashintulukaku. Kabààkwikala kàbìdì mùshindù ùvwàbo kale awu to. Nebiikale ci—cifùkiibwà cìshintùlùke kuumukila ku mpindyewu. Swàku bwà bòbò, ànu mùvwà beena meeji abu amu, bakudimukè ne kabàyi kwalukila ku bilèlè byà pa buloba (ne Helòòdè, mu nzùbu wa bukalenge wa mfùmù awu's), “Kàdi biikale badimwijiibwe kùdì Nzambì, bòbò bàkapambuka.” Enzàku nànkù, Mukalenge.

¹⁴⁰ Dilòòlò edi ndi ndòmba bwà mwena meeji yònsò, mwànà wa balùme, anyi wa bakàjì, mu mwab'ewu emu dilòòlò edi. . . Mulùme anyi mukàjì udi ne lungenyi lukùmbàne bwà kukoma nyimà ku maalu à pa buloba dilòòlò edi, kanwàlukidikù cyàkàbìdì paanyimà pàà ditùkù edi to. Paanyimà pàà edi—pàdì ditùkù edi ne dilòòlò edi bìpita, kabààlukidikù kàbìdì ku maalu à pa buloba to, kàdi swàku biikale beena meeji. Nènku kaaDìyi kakesè kàdì kakàyi kumvwika aka kàdi kènza ne bèle byanza muulu bàmbè ne: “Èyowà, ndi muswè bwà Dipà dyà Nzambì. . .” Swàku bwà cintu cimwècimwè cìdì cibenzeje bwà kwelabo byanza byàbò muulu aci, cibafwanyikije dilòòlò edi ne lufù Lwèndè, dijiikiibwa, ne dibiikà dyà ku lufù, pa kubàpa kwà Nyumà Mwímpè. Swàku bwà bàkomè nyimà.

¹⁴¹ Swàku bwà bakàjì aba dilòòlò edi, Mukalenge, bàdìbi bikolela nùnkù bwà kubènga kuumvwangana ne byà pa buloba; bàlekele nsukì yàbò yileepa, ne balwàte bu bainàbànza, ne buumushe bilaabu byònsò ne bintàkanyì, byà bikwàtakaja ku byanza ebi, bìdì bìleeja. . . bìdì—bìdì bimanyisha ne kabeena ne mubidì tumatuma to, bàdì. . . kùdì—kùdì cintu kampànda cìdì kacìyi mu cyòcì to. Nènku swàku bwà dilòòlò edi,

Bukênkè bukesè bùdì kabùyì bumvwika ebu, Mukalenge, bùdì bubafikishe ku dyela byanza byàbò muulu ebu, swàku bwà bambeku ne: “Mukalenge, ndi nkoma nyimà ku maalu à pa buloba, dilòlòlò edi.”

¹⁴² Balùme aba bàdì kabàyì banjì kupeta ci—ci—cintu cilelèla aci, bwà bafwànyine kuyiikila ne bakàjì bààbò ne kubafikisha kudikoma nyimà; ne bintu bìdìbo bènza. Swàku bwà twètù bwònsò pàmwè, Mukalenge, tukudimuke ànu dilòlòlò edi, bìikàlè badimwijiibwe kùdì Nzambì ku diyiisha dikesè dyà pabwàdì dyà—dyà Bukênkè bwà Nzambì bùdì butuuta pa myoyi yètù. Swaku bwà tukome nyimà dilòlòlò edi ne—ne twikalè ne mwoyi Bwèbè Wèwè matùkù ètù ònsò, tuya—tuya Neebè kumètètù mu njila mukwàbò mushiilàngàne ne utùvwà bendèle. Enzàku nànkù, Mukalenge. Tùvwijèku beena Kilistò batàmbe bwìmpè, mwena Kilistò yònsò kaaba aka dilòlòlò edi, Taatù, udi muKwitàbe ne muKwitàbùùje awu. Nènku bàkaadi batèete kwikala ne nsòmbelu wa bwena Kilistò, kàdì dilòlòlò edi, swàku bwà kukùdimukabo, swàku bwà bapete Dipà adi.

¹⁴³ Éyi Nzambì wa yààyà, cìdì—cìdì—cìdì njila mudyombòdìibwe. Bakàjì nebàbìikidìibwe ne “bàà cìkùlùkulù,” nebàbìikidike mènà ònsò. Ne balùme nebàbìikidìibwe ne “bakoleshi bàà maalu.” Kàdì twètù tudi—tudi badìlongolole, Mukalenge.

¹⁴⁴ Nyumà Mwìmpè, tükudimuneku, mpindyewu mene. Nkudìmuneku, Mukalenge. Ncyèna—ncyèna—ncyèna muswè nànsha bwà kuya njila kanà yònsò ewu udi mufwànyine kundalula bwà kuumuka kùdì Wèwè to. Mukalenge, ndi—ndi muswè kuya ànu mu njila uWikala muswè bwà mèmè kuya awu. Ndi muswè bwà dipà dyà mwoyi wanyi diikale dipwàngàne menemene mu mùshindù wa diKumanyishisha, Mukalenge, pa buloba, bwà ne Kwèna mufwè to, Udi ne mwoyi.

¹⁴⁵ Wèwè udi Nzambì wa bàdì ne mwoyi, kì n’Nzambì wa bafwè to. Bafwè mbabwikila bwònsò kùdì njiji, ne njiji yà pa munyiinyi, yèla bikusù ne yitwala mikwàbò njiji yà pa munyiinyi; bu mùdì muntu udi unwà maala èndè à kumpàla, unwà mucì wèndè wà mfwankà wà kumpàla, wamba mashimi èndè à kumpàla, upàtuka ushiya wèndè mukàjì bwà musangu wà kumpàla; anyi mukàjì udi upàtuka ushiya wèndè mulùme awu, anyi wènza bintu bìdì bibi; ànu bu batuuta kùdì lujiji lwà pa munyiinyi, ne lu . . . bìdì—bìdì bikungwija ku . . . bìbandisha mu mipuuya ne bukooya, bwalu cìdì pa musùukà mufwè munda amu. Nyumà mibì yìdì yìbùùkamù. Ne nyumà mubì umwe ùdì ùmufikisha ku dyenza cintu cìkwàbò kàmpànda; ne mukwàbò kàbìdì ùdì ùlwa, ùmusaka ku dyenza cintu cìkwàbò bwalu mmwenze *eci*.

¹⁴⁶ Nzambì, swaku bwà bacyunguluke ne balwe ku Mwoyi. Swàku bwà bòbò kujúuka, ne Banjèlo bàà Nzambì kupweka

ne mapà a Mwoyi wà Cyendèlèlè, Mukalenge, ne kuya ku bucimunyi ne ku bucimunyi. Enzàku nànkù, Taatù. Tudi tucyùnguluka, dilòòlò edi, tuumuka ku maalu à pa buloba ne ntàtu yà pa buloba, badimwijiibwe kùdi Nzambì ne cikondo cikaadi pabwipi, Yesù ùdi wàlukila pa buloba. Nènku swàku bwà Nyumà Mwimpè Munène atùpè, dilòòlò edi, Mwoyi wa Cyendèlèlè utùdi tujinga awu. Enzàku nànkù, Mukalenge. Tudi—tudi tulòmba ànu bwà Wèwè kutùpèeshakù mabènesha aa patùdi tuàlòmba mu Dìna dyà Yesù Kìlistò apa.

Ne mitù yètù miinyika:

¹⁴⁷ Beena meeji kale wàwa bàkalwa ku cyòci aci . . . bàakalonda Bukènkè abu ne ku . . . bàakasangana Bukènkè Bupwàngàne abu. Nènku swàku bwà Bukènkè bukesè abu, dilòòlò edi, bwàkufikishì ku dyela cyanza cyèbe aci muulu, anyi pàmwàpa kùvwa nànsa . . . Bwàkulengi, kàdi wèwè kùyikù nànsa mwele cyanza cyèbè muulu to, Bukènkè abu bukulombole buludi too ne ku Bukènkè Bupwàngàne abu.

Tujuukilàayi bònsò kuulu, bwà mudimu mukèsè wà didilàmbula.

¹⁴⁸ Tuvwijàayi mwoyi wètù mukèsè ewu, dilòòlò edi, mwaba wà cisòmbelu cyà Kìlistò. Vùlukàayi, dilòòlò edi, kaabwalu kàanyi kakesè kàa muntu mulalakanyi aku. Dilòòlò edi, mu bulelèlè, Yesù Kìlistò ki mulalakanyi awu mu mùsèèsù. Ncyà bushùwà, Yèyè—Yèyè ùvwa mulalakanyi mu mùsèèsù. Kaa, èyowà's, tudi twamba ne: “Tudi tuMusadila.” Bushùwà. Dibàlakana dyònsò ne milòwu, kì n'Yèyè to. Awu kì n'Yèyè to. Bivwa bikèngela bwà Yèyè kufwà bwà kunùtwadila Dipà edi, kaayi ciipòpì to, kàdi Mwoyi. Bivwa bikèngela bwà Yèyè kufwà bwà kucyènza, bwà kufika kunùdi, mùshindù ùmwèpelè ùvwaYe mwà kufika kunùdi. Yèyè kavwa ànu mwà kulwa apa kàdi kwikala Muntu mupwàngàne, mùvwàYe amu, ne kufika kunùdi to. Kavwa mwà kucyènza mùshindù awu to. Byàkakèngela bwà Yèyè kufwà bwà kucyènza, bwà kufikisha—kufikisha Dipà dyà Nzambì adi kunùdi. Ànu bu—mùvwà mulalakanyi ne cyà kufwà bwà kufikisha kaapòpì kakesè aku kùdi mwanèndè wa bakàji, Kìlistò ùvwa ne cyà kufwà bwà kufikisha Nzambì kunùdi. Tudi baswè kuMwitaba dilòòlò edi. Ne ndi ngiitabuuja, ne mitù yètù miinyika, . . . nènku twèlàayi ànu byanza byètù muulu kùdi Nzambì ne tulàmbule cyàkàbidi nsòmbelu yètù, mwab'ewu mene dilòòlò edi.

¹⁴⁹ Éyi Nzambì wa Ngàsà, tudi—tudi baswè Dipà Dyèbè. Ndi—ndi mwab'ewu, bu mùdi muvù wa Noël ewu, Mukalenge, pàndi njingulula ne ntàngila pa buloba ebu ne mmòna dibalakana ne milòwù byà ditùkù edi, Ndi—ndi mwà kumòna ànu . . . kwàka nàka, bu mùdi Bible mwambe, cikondo cyà Laòdikiyà eci, Wèwè udi pambèlu pàà èkèleeziyà Webè. Udi mubèngiibwe, munyeemakanyi kùdi èkèleeziyà Webè Wèwè mwine ne kùdi

cisàmbà Cyèbè Wèwè mwine. Udi—Udi—Udi mubèngiibwe. Mu—munyeemakanyi mwikale cintu kampànda cidì cibèngiibwe, ne Wèwè udi mubèngiibwe mu èkèleeziyà Webè Wèwè mwine. Udi mubèngiibwe munkaci mwà cisàmbà Cyèbè. Ki mbaKuswe to, Mukalenge, ne mbaKulekèle, bu mulalalakanyi, mu mùsèèsù. Nzambi, Wèwè—Wèwè—Wèwè wàkafwa ànu kufwa, nànsha byà munyi, bwà Wèwè kumòna mwà kutùtwadila Dipà dyà Nzambi. Nènku tudi tuDiitaba ne didipwekesha dyònsò, Mukalenge. Ndi ndòmba bwà Wèwè kuuja ànu myoyi yètù ne nsòmbelu yètù. Nènku tukudimunàku, kuumukila ku dilòòlò edi, nènku swàku bwà twètù kwikala Bèèbè mu kaabujima patùdi tudilambula kùdi Wèwè apa.

¹⁵⁰ Ngakidilèku, Mukalenge. Bilema byà mu nsòmbelu bìndì mwenzè byàbùngì. Nènku, Nzambi munanga, bu—bu mùndì—bu mùndì mwimane mwaba ewu mu mwaba munsantu ewu ùdi Èvànjeeliyò muyiishùbwe ne utùdi baKumòne mwaba ewu, nànsha mene mu—mu Bukènkè bunène bùdi bubàkenkeshè. Nènku tudi ne kusàkidila kwàbùngì bwà bwalu ebu, Mukalenge. Ndi—ndi ndilambula mèmè mwine bwà Noël ewu, kabìyi mu. . . bu mùdi bàà pa buloba bafwànyine kwenza anyi bwà—anyi bwà kwamba ne bikulukulu bishiile bipyabìpyà mwaba to. Mukalenge, ndi—ndi muswè ànu kwitaba Mwànà Webè. Ndi—ndi muswè kwitaba Dipà Dyèbè, Mukalenge.


¹⁵¹ Ndi muswè kwitaba Dipà dyà Mwoyi wà Cyendèlèèlè kupicila ku Kilistò. Nènku mèmè, mu bulelèlè, Mukalenge, ndi ngiitaba Dipà dyà Kilistò kùndi, bwà kuteeta kuKupetela bakwàbò. Nzambi, twètù bònsò. . .

¹⁵² Vwija mukàji mukesè wà nzùbu mupole ne mudipwekeshe, bwà wàkumbana mwà kulombola bakwàbò kùdi Wèwè. Dipà dy'Ùdi mumupèeshe, bukàji bwà nsongo bwà buinàbànzà abu, swàku bwà yìkalè ne mmwenekelu wa buinàbànzà mu mùshindù wà ne beena mutumba bafike ku dimumòna ne—ne bajinge kwikala bu yèyè.

¹⁵³ Enzàku bwà muntu awu, mupànyìshidyanganyi wa mu makàjiinyi, nànsha yèyè mwikale nganyi, Mukalenge; umuvwije mwena nsòmbelu wa bupwekèle, bu Kilistò, bwà bakwàbò bààmònakù. Katwèna bamanye mwaba wùdi bantu abu biimanyine kwàka to, Taatù, kàdi katwèna baswè kuumuka mu cibebe cyà cinène, cyà kale aci to; kàdi netwiname paanyimà, twinama kumpàla, twolola cyanza ne mwètù mwònsò mwaba wònsò bwà kupeta musùukà. Utèèkakù pabwìpi nèètù, Mukalenge, mmutùdi tulòmba. Nènku utupeku nsò—nsò—nsòmbelu udi mufwànyine kufikisha bantu ku dijinga kwikala ne nsòmbelu wa nànu awu, patùdi tudilambula kùdi Wèwè, dilòòlò edi apa. Mu Dìna dyà Yesù Kilistò. Amen.

Mpindyewu, bu nwènù mwà kwinyikakù kàbidì mitù yènù, ndi muswè kujingila umwe ne umwe wènù Noël wa disànka:

¹⁵⁴ Ditàpishì dinène dyà Noël adi, dyà kumpàla Adi ne dimwèpelè ne dyà ku cibangidilu ne Dimwèpelè didiku adi, Yesù Kilistò, yìkale cyàkàbidì mu mwoyi wèbè dilòòlò edi. Nyumà Mwìmpè alweku kùdì ne àkutwàdile mapà à mudimu wà bwambi ne bikwàbò byà kùdì Nzambi, bwà wèwè. . . dipà dyùdì mufwànyine kwikala ne nsòmbelu mutàmbe bwìmpè. Ki cìndì mèmè muswè ncyôci aci. Mbipìciìbwe ne mèmè mwikale ne Mwoyi wà Kilistò munda mwànyì bwà kwikala ne nsòmbelu wa kalòlo ne wa bucumunyi pamutu pàà mèmè kwikala ne mapà ônsò à dyondopa, mapà a bipròfetà, mapà makwàbò ônsò awu; mpèèshè mèmè ànu Yesù. Ngiikale ne nsòmbelu wa Mwoyi, Mwoyi ki wùndì muswe kwikala naawu. Ndi muswè kwikala ne mwoyi bwà bakwàbò bààmònaku mwà kumanya. Ki dyànyì—ki dyànyì dijinga dyà Noël ndyôdì adi, nènku ndi ndòmba bwà ciikalè dijinga dyèbè. Nènku ndi ndòmba bwà Nzambi àtupe dijinga Dyèndè.

¹⁵⁵ Mpindyewu, twǎnjibi kuumvwa díyì dyà kùdì Mpaasàtà, ne ditangalajangana. Nènku Nzambi ànùbènèshè. Netùnùmòne mu diisàtu dilòòlò. Too ne pa diine díbà adi, Nzambi ànùbènèshè. 

MÀPÀ À NZAMBÌ ÀTU MISANGU
YÒNSÒ ÀNU ÀPETA MYABA YÀWÙ LUA63-1222
(God's Gifts Always Find Their Places)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòòlò, dya matùkù 22 à ngondo wa ciswà-munènè, cidimu cyà 1963, ku Branham Tabernacle mu Jeffersonville, mu Indiana, U.S.A. Ndyumusha pa mukaba wa mêtì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org